

Autoridadnan a captura sospechoso den tiramento na The Village



Pagina 2

- **Famia di Alexander Flores ta pidi clausura inmediato di centro di cuidu**

Pagina 3


- **Segun partido MEP: Minister Geoffrey Wever a exigi MEP retira for di reunion di KvK tocante HOFA**

Pagina 6

- **Comentarionan di Van der Burg tocante Status Aparte ta desata tormenta politico**

Pagina 2

Ombudsman di Aruba a participa den IOI Board of Directors Meeting 2026



Pagina 6

Segun prome minister Hulandes: Relacionnan cu Merca a cambia "irreversiblemente"



Pagina 9

Grado di morto den brote di Ebola na Congo ta bao di 25%, segun WHO



Pagina 7

Autoridadnan a captura sospechoso den tiramento na The Village

Cuerpo Policial Aruba conhuntamente cu Ministerio Publico ayera a informa tocante e detencion di sospechoso Li-Angelo Robert Rayshen Carmona Alcantara naci na Aruba dia 26 october 2007, alias "Kuki". Esaki ta relaciona cu e caso di tiramento cu a tuma lugar diadomingo madrugada 24 di mei 2026 den e parkeerplaats di The Village.

Mas trempa den dia, polis a pidi ayudo urgente di comunidad pa yega na e sospechoso, y a adverti cu e personanan cu tin e sospechoso scondi tambe ta haci nan mes culpable na un hecho castigable y por keda deteni.

Ta sospecha Carmona Alcantara di e homicidio di Rayden K.A. Kock.

Segun Cuerpo Policial di Aruba a informa anteriormente, pa alrededor di 1:18 di marduga riba diadomingo, Central di Polis a haya un notificacion cu un hende homber a ricibi tiro y no ta reaccionando den e parking lot di Fat Tuesday.

Inmediatamente central a despacha polis y ambulance cu urgencia pa e sitio di e incidente.

Na momento cu polis a presenta na e sitio, berdaderamente a bin topa cu un hende homber cu no tabata reacciona. Na su turno, ambulance a presenta pa duna tratamento na e victima; sinembargo, lamentablemente

no tabatin nada cu por a haci mas pa e persona en cuestion.

Recherche y polis tecnico a presenta pa asina por haci nan investigacion mientras cu e dokter forensico a presenta y a constata e morto di e hende homber, ken pa e momentonan ey no tabatin informacion di ken e ta.

Inicialmente, polis a bisa cu mas informacion di e victima lo ser duna na momento cu familiarnan identifica su persona. Mas adelante, a publica un actualisacion unda a informa cu e famia a reconoce e victima y a informa cu ta trata di e hoben Rayden K.A. Kock, naci na Aruba dia 3 di juli na 2008, pues e victima tabatin apenas 17 aña di edad.

TA WORDO

BUSCA

PA HUSTICIA

NOMBER
LI-ANGELO ROBERT RAYSHEN CARMONA ALCANTARA

ALIAS: **KUKI**

FECHA NACIMIENTO
26 OKTOBER 2007

ALTURA
1.58M

SI BO TIN CUALKIER INFORMACION CU POR YUDA LOCALSA E PERSONA AXI MENCIONA, POR FAVOR YAMA NOS TIPLIJN

11141

URGENTE

SERVICIO INTEGRIDAD SEGURIDAD KPA.AW

Comentarionan di Van der Burg tocante Status Aparte ta desata tormenta politico



Comentarionan recien di Secretario di Estado pa Relacionnan di Reino, Eric van der Burg a reanima un tormenta politico na Aruba, poniendo e debate tocante e propuesta di ley HOFA un biaha mas den centro di discusion publico.

Politiconan di oposicion a reacciona fuertemente despues cu Van der Burg a bisa den un video cu e "Status Aparte" di Aruba no ta existi mas di e mesun forma cu antes, cu algun interpretando su comentarionan como un reto directo contra autonomia constitucional di Aruba dentro di Reino Hulandes.

E controversia ta yega tiki despues cu Aruba a celebra 40 aña di Status Aparte, un logro conmemorando e separacion di Aruba for di Antias Hulandes na 1986, y su reconocimiento como un pais autonomo dentro di Reino. Van der Burg a bisa cu Aruba "tabatin" un Status Aparte pero awo ta simplemente un "pais" den Reino, pues cu e significado di Status Aparte a cambia desde cu Corsou y Sint

Maarten a obtene status di pais na 2010.

Ora Antias Hulandes a disolve na 2010, a stop di usa e termino "Status Aparte" ya cu e status di Aruba no ta separa mas, sino ta e norma pa tur pais dentro di Reino. Posicion di Van der Burg – cu e termino no ta aplica di mesun manera mas – ta consistente cu al menos un interpretacion autoritativo.

Pero e comentarionan a ricibi critica inmediato di miembronan di partido di oposicion MEP. Parlamentario Shailiny Tromp-Lee a describi e comentarionan como "constitucionalmente incorrecto," argumentando cu Aruba no a perde su Status Aparte na momento cu e otro islanan a bira pais den Reino. Segun e parlamentario, Aruba a logra e status aki na 1986 mientras Corsou y Sint Maarten a alcanza un posicion comparable te na 2010, es decir, "no kiermen cu Aruba a perde nada. E kiermen cu e otro nan a yega na locual Aruba tabatin caba."

Lider di MEP, Evelyn Wever-Croes, tambe a reacciona fuertemente, insistiendo cu Status Aparte y status di Aruba como "pais" ta mesun cos. El a argumenta cu cualkier otro sugerencia lo representa un mal comprendemento peligroso di e identidad constitucional di Aruba. Parlamentario Xiomara Maduro a bisa cu e comentarionan ta demostra cu autoridadnan na Hulanda no ta comprende completamente kico Status Aparte di Aruba ta representa, a pesar di sigui tuma decision cu ta afecta futuro di Aruba.

HOFA

E tension politico rond di comentarionan di Van der Burg ta profundamente conecta na e debate andando tocante e propuesta di Ley di Reino HOFA, conoci den Hulandes como Houdbare Overheidsfinanciën Aruba.

E ley ta diseña pa crea un marco nobo pa supervision financiero y disciplina presupuestario na Aruba, mientras tambe ta permiti e isla pa beneficia di costo mas abao pa prestamo via Hulanda.

Proponentenan di HOFA, incluyendo miembronan di gobierno actual y oficialnan Hulandes, ta argumenta cu e acuerdo lo duna Aruba bentaha financiero mayor. Segun Colegio di Supervision Financiero (CAft), Aruba por spaar decenas di miyones di florin anualmente den pago di interes door di refinancia prestamonan existente bao condicionnan financiero Hulandes. E placa aki, e sostenedornan ta argumenta, lo por libera recurso pa cuido di salud, educacion, infraestructura y desaroyo economico.

Gobierno tambe ta pone enfasis riba e hecho cu Aruba ya ta opera bao formanan di supervision financiero estableci a traves di acuerdo y protocol anterior bayendo back na 2015. Di e perspectiva aki, no ta mira HOFA como un entrega di soberania, sino como un modernisacion y actualisacion di acuerdonan existente.

Ademas, proponentenan ta argumenta cu e ley lo duna mas estabilidad financiero, mehora credibilidad internacional di

Aruba, y yuda garantisar finanzas publico sostenible pa futuro. Prome minister Mike Eman (AVP) y otronan a presenta HOFA como un partnership practico dentro di Reino na lugar di un mecanismo colonial. Nan ta argumenta cu den un economia global cada bes mas incierto, Aruba ta beneficia di cooperacion financiero mas cercano cu Hulanda. Gobierno Hulandes a defende e propuesta di un manera similar, insistiendo cu instabilidad financiero den un pais di Reino por afecta henter e Reino, haciendo algun forma di supervision razonable.

Mas cu supervision

Oponentenan ta keda skeptico. Criticonan ta argumenta cu HOFA ta bay mas leu cu supervision financiero tecnico, y na lugar di esaki ta crea un precedente peligroso cu por debilita autonomia di Aruba en practica.

Academico Constitucional, Douwe Jan Elzinga a publica un analisis legal largo den cual el a adverti cu e ley proponi ta contene fayonan constitucional significante, y por limita autonomia di Aruba significativamente.

Un di e preocupacionnan central expresa pa criticonan ta cu gobierno di Reino, mediante Rijksministerraad, lo gana influencia riba legislacion financiero y decisionnan presupuestario di Aruba. Oponentenan ta teme cu esaki gradualmente lo cambia autoridad for di Aruba su propio institucionnan democratico pa Hulanda.

Elzinga a argumenta cu e asina yama consensus Rijkswet a keda

evoluciona cada bes mas den un instrumento poderoso mediante cual Hulanda por dirigi paisnan Caribense den Reino.

Otro critica mayor ta involucra e supuesto naturalesa temporal di e supervision financiero. Mientras ta presenta HOFA como un areglo limita for di cual Aruba eventualmente por sali, criticonan ta argumenta cu no tin suficiente garantia cu e supervision lo termina berdaderamente despues di algun aña. Nan ta muestra riba e experiencia di Corsou y Sint Maarten, unda supervision financiero introduci na 2010 a continua hopi mas largo cu loke a anticipa originalmente.

Awo e debate a bira tocante hopi mas cu djis finanzas publico. Pa hopi na Aruba, e asunto ta toca directamente riba identidad nacional, autonomia y e significado di Status Aparte mes. Sostenedornan ta mira HOFA como un herment financiero necesario cu lo reforsa economia di Aruba y crea estabilidad a largo plaso. Oponentenan ta mir'e como un cambio constitucional peligroso cu ta risca mina decadas di lucha politico pa autonomia.

Mientras tension ta sigui crece, comentarionan di Van der Burg a bira simbolico di e miedo y frustracion mas amplio rond di e relacion entre Aruba y Hulanda den futuro. Si na final ta bay recorda HOFA como un acuerdo financiero pragmatico of como un punto di cambio den historia constitucional di Aruba ta keda un di e preguntanan politico mas importante cu nos isla ta enfrenta.

Famia di Alexander Flores ta pidi clausura inmediato di centro di cuidu responsable pa incidente cu a casi cobra bida di nan yiu

Un peticion formal a ser presenta na minister di Enseñansa y Hubentud, Gerlien Croes, pidiendo intervencion inmediato contra Bright Minds Daycare Center na San Nicolas despues di e incidente di februari ultimo den cual e mucha di cinco aña, Alexander Flores, a ser laga den un vehiculo di transporte pa varios ora y despues a ser haya inconsciente.


E peticion, entrega pa oficina legal Athena Adviseurs na number di e mayornan di Alexander, ta pidi autoridadnan pa tuma medida urgente bao di e Landsverordening Kinderopvang. Segun e documento, e famia ta pidi gobierno pa para temporalmente operacion di e centro di cuidu te ora por garantisar seguridad di e muchanan, of alternativamente impone sancion y medidanan correctivo contra e institucion.

E documento ta describi e eventonan di 24 di februari 2026, ora Alexander a ser busca pa transporte conecta cu Bright Minds Daycare Center despues di atende Fontein Kleuterschool na San Nicolas. Segun e peticion, e mucha nunca a yega e centro di cuidu y en cambio a keda atras den e vehiculo di transporte.

E documento ta bisa cu ora tata di Alexander a yega rond di 5:30 di atardi pa busca su yiu, presuntamente el a ser informa incorrectamente cu ya caba e mucha a bay cas, pero esaki no tabata e caso. Alexander finalmente a ser haya den e auto inconsciente, no tabata hala rosea, su curason no tabata bati y e tabata muestra señalnan di exposicion severo na calor.

Personal medico na ImSan a reanima e mucha prome cu el a ser transporta pa Dr. Horacio Oduer Hospital y despues pa Colombia pa tratamiento specialisa intensivo. Segun e peticion, Alexander a permanece hospitalisa pa aproximadamente siete siman y ainda ta sufrir consecucionnan di largo plaso, incluyendo limitacionnan motorico, perdida di forsa y sintomanan di stress postraumatico. E documento ta indica cu terapias manera fisioterapia, terapia ocupacional y logopedia ainda ta sigui.

Abogadonan di e famia ta argumenta cu e gravedad di e incidente ta muestra un peligro inmediato pa tur mucha cu ta bao cuidu di e centro di cuidu en cuestion y ta husti-



fica intervencion urgente bao di e Landsverordening Kinderopvang di Aruba.

E peticion especificamente ta pidi minister Croes pa emiti un orden bao di articulo 39 di e ley obligando suspension inmediato di operacionnan di e centro di cuidu te ora autoridadnan por verifica cu seguridad y proteccion di tur mucha cu ta asisti e centro di cuidu aki. Si no emiti tal orden di clausura, e famia ta pidi medidanan alternativo di aplicacion, incluyendo accionnan correctivo obligatorio, sancionnan administrativo y financiero.

Segun e peticion, e famia tambe ta sostene cu e centro di cuidu tabata operando sin e permiso rekeri bao di articulo 2 di e Landsverordening Kinderopvang. E documento ademas ta alega cu e institucion no tabatin procedementonan organisacional adecuado ni protocolnan di emergencia pa transporte manera prescribi den e directivanan di calidad pa centro di cuidu di mucha.

E abogadonan ta argumenta cu aunke e sistema di permiso pa centro di cuidu na Aruba ainda no ta completamente operacional pa motibo cu reglamentonan di implementacion ainda no ta finalisa, autoridadnan ainda tin responsabilidad legal pa sigura cumplimiento cu standardnan material di seguridad y interveni den situacionnan unda tin peligro inmediato pa muchanan.

E documento legal tambe ta referi na articulonnan 9 y 10 di e Landsverordening Kinderopvang, cu ta tocante ofrece cuidu di mucha den un ambiente sigur y garantisar un organisacion adecuado y reparticion di tareanan den institucionnan di cuidu di mucha.

Den e peticion, e famia ta bisa cu e centro di cuidu ainda ta opera a pesar di e incidente y a

pesar di e gravedad di e caso di Alexander. E documento tambe ta nota cu e famia ta considera nan mes directamente afecta bao di ley administrativo di Aruba pa motibo di e daño fisico sufrí pa nan yiu.

E caso di Alexander a genera atencion publico significativo y debate na Aruba tocante supervision di centro di cuidu di mucha y responsabilidad.

Mas trempa e luna aki, famia di Alexander a critica Fundacion Pa Nos Muchanan publicamente y a cuestiona e rol di institucionnan responsable pa supervision di centronan di cuidu y proteccion di mucha na isla. Den un declaracion publica riba rednan social cu despues a circula ampliamente riba social media, e famia a expresa frustracion cu empleadonan involvi den e incidente ainda tabata participando den actividadnan educativo y relaciona cu cuidu di mucha.

E declaracion di e famia a ricibi centenares di reaccion y comentario di publico pidiendo contestanan tocante supervision di centronan di cuidu y responsabilidad di entidadnan gubernamental.

Den nan declaracion publico, e famia a acusa tanto e organizacion como autoridadnan di falta di empatia durante nan sufrimento. E famia tambe a cuestiona dicon empleadonan conecta cu e incidente ainda tabata participando den eventonan relaciona cu cuidu di mucha y educacion mientras investigacion ta andando ainda.

E peticion formal entrega e siman aki ta representa e ultimo esfuerzo di e famia pa pusha accion administrativo formal pa parti di gobierno.

Abogadonan di e famia ta argumenta den e documento cu e criterio legal pa intervencion ya a ser cumpli pasobra e hechonan di e caso presun-



tamente ta muestra un menasa directo y inmediato pa salud y seguridad di muchanan cu ta bao di cuidu di e centro en cuestion.

E abogadonan ademas ta argumenta cu e proposito di e podernan di emergencia conteni den articulo 39 di e Landsverordening Kinderopvang ta precisamente pa permiti autoridadnan responde rapidamente den situacionnan unda muchanan por enfrente riesgo inmediato.

Te ainda, ningun declaracion publico di ministerio di Enseñansa y Hubentud tocante e peticion formal a ser publica.

Preocupacion publico tocante seguridad den centro di cuidu a intensifica den añanan reci-

ente mientras mas mayor ta depende riba servicionan di centro di cuidu y areglonan di transporte pa muchanan chikito. E caso di Alexander Flores a rebiba discusionnan tocante standard operacional, protocol di emergencia y aplicacion regulatorio pa procedornan di cuidu di mucha riba isla.

E documento legal aki ta enfatisa cu e peticion di e famia no ta solamente tocante responsabilidad pa loke a pasa cu Alexander, sino tambe tocante preveni incidentenan similar cu otro mucha.

E peticion ta conclui pidiendo autoridadnan pa reconoce e gravedad di e caso y actua conforme esaki.

Aruba ta sigui avansa cu reformanan financiero a pesar di retraso legislativo y reto di capacidad

Gobierno di Aruba ta sigui avansa cu reformanan financiero pa mehora transparencia, supervision presupuestario y manejo di finanzas publico. E ultimo “Uitvoeringsagenda y Uitvoeringsrapportage Landspakket Aruba” ta mostra progreso importante den varios area, aunke retrasonan legislativo y falta di personal ta keda un desafio den implementacion di algun reforma.

E rapport ta describi e progreso di reformanan relaciona cu Landspakket Aruba, un paquete amplio di reformanan gubernamental y economico firma originalmente na 2020. Capitulo 1 di e informe ta enfoca riba “Financieel Beheer”, of manejo financiero, y ta presenta un cuadro mixto di progreso concreto hunto cu retrasonan continuo den varios proceso legislativo importante.

E reformanan ta diseña pa sigura cu gobierno di Aruba ta bira mas eficiente y transparente den manejo di finanzas publico. Segun e rapport, e vision principal ta crea un ciclo presupuestario cu ta “eficiente y efectivo”, permitiendo gobierno mantene control di finanzas publico mientras e ta garantiza rindimento di cuenta adecua na Parlamento di Aruba.

Entre e desaroyonan mas relevante menciona den e rapport tin e implementacion di e “three lines model”, un marco di gobernacion y control cu tin como meta fortalece supervision di procesonan financiero den diferente departamento gubernamental. Gobierno ta indica cu e modelo ta busca establece responsabilidad mas cla pa manejo di riesgo, control interno y responsabilidad financiero den ministerio y entidadnan publico.

Un logro importante den e esfuerzo aki tabata e establecimiento di e “Steunpunt Interne Beheersing” (SIB), of Centro di Apoyo pa Control Interno, den Directie Financiën. E centro di apoyo a ser oficialmente lansa na october ultimo y su tarea ta pa yuda departamentonan fortalece mecanismonan di control interno y mehora cumplimiento cu proceduranan financiero. E rapport ta señala cu e proceso nobo y controlnan financiero a ser introduci caba na seis departamento y servicio gubernamental grandi.

E rapport ta identifica gobernacion financiero manera un di e trayectonan di reforma mas avansa den e marco di Land-



spakket. Varios iniciativa a ser completa caba, incluyendo introduccion di reglamento nobo di adkision y reglanan actualisa pa manejo di bienes material. Ambos set di reglamento a drenta na vigor riba 1 di januari 2026.

Autoridadnan tambe a reporta cu e atraso largo den preparacion di cuentanan anual a ser elimina. Cuenta anual di 2024 ta completa, marcando loke e rapport ta describi manera un paso importante pa reestablece regularidad y puntualidad den reportahenan gubernamental.

Otro iniciativa significativo menciona ta e introduccion di e plataforma digital di enseñansa conoci como E-LOFA (Leer-gang Openbare Financiën Aruba). Segun e rapport, e prome 100 participante a cuminsa training na december 2025. E programa ta destina pa fortalece conocimiento financiero entre empleadonan publico y sostene continuidad di e reformanan riba termino largo.

A pesar di e progreso aki, e rapport ta adverti repetidamente cu retrasonan den legislacion critico ta keda un preocupacion grandi. Principal entre esakinan ta e modificacion di Aruba su Comptabiliteitsverordening, e marco legal cu ta regula contabilidad publico y reportahe financiero. E propuesta di modificacion a ser presenta na Raad van Advies, pero aprobacion final ainda no a ser completa.

E retraso aki tin un efecto domino riba otro reformanan, incluyendo implementacion di un sistema gubernamental di reportahe financiero nobo. Aunke e marco di reportahe a ser aproba caba pa Consejo di Minister y actividadnan di implementacion ta den marcha, aplicacion completo di

e sistema nobo ta depende di aprobacion formal di e ley revisa di contabilidad.

E rapport ta caracteriza e obstaculonan legislativo aki como “randvoorwaardelijk”, loke ta nifica cu nan ta prerequisite pa progreso mas amplio den reforma financiero publico. Sin nan, varios proyecto por enfrente retraso adicional.

Limitacion di capacidad tambe ta sigui representa un reto pa implementacion. E rapport ta nota cu varios proyecto den cuadro di “three lines model” a experiencia retraso pa motibo di falta di personal den e prome liña di control financiero — e departamentonan operacional encarga cu manejo diario di finanzas. Mientras cu procesonan financiero pa seis di 15 departamento obhetivo a ser diseña y implementa caba, e departamentonan cu a falta ta atrasa. Autoridadnan awor ta spera cu finalisacion lo tuma lugar den e di tres trimester di 2026.

Di mesun manera, designacion y training di doñonan di proceso y control den departamentonan a tuma mas tempo di loke tabata anticipa. Gobierno ta atribui e retrasonan aki na capacidad limita di personal y demanda operacional di competidor. Sinembargo, e rapport ta mantene cu e metanan general di reforma ainda ta alcansable den e cuadro di tempo di e acuerdo actual di cooperacion, mientras cu no tin mas contratempo.

Gobierno tambe ta trahando pa mehora calidad y confiabilidad di administracion financiero pa medio di mecanismonan di supervision mas fuerte. Bao di e di dos y di tres liña di e modelo di gobernacion, funcionnan di apoyo y control ta ser fortalece pa sigura monitoreo y miho

auditoria di actividadnan financiero. E rapport ta nota cu Centrale Accountantsdienst ta sigui confronta dificultad di personal despues cu esfuerzo anterior di reclutamento no a logra atrae suficiente profesional califica. Como solucion temporal, autoridadnan ta busca pa usa capacidad externo di auditoria pa un periodo di tres año.

E tema di auditoria externo ta keda otro componente importante di e agenda di reforma. Aruba ainda no a cuminsa auditoria formal externo di su cuenta anual bao di e cuadro nobo. Un proceso di destaho pa servicio di auditoria externo actualmente ta andando y ta spera cu esaki lo conclui den prome mita di 2026 pa asina actividadnan di auditoria por cuminsa den e di dos mita di e año. E prome cuenta anual completamente audita ta proyecta pa keda cla den di tres trimester di 2027.

Modernisacion tecnologico tambe ta un punto central den e reformanan. Autoridadnan ta preparando un aplicacion di apoyo presupuestario nobo destina pa mehora preparacion, monitoreo y reportahe di presupuesto. Despues di retrasonan anterior, e fase di consulta cu mercado a keda cla y un plan di implementacion a ser finalisa. Ta spera cu actividadnan di adkision lo conclui den di dos trimester di 2026, mientras cu e prome fase di implementacion lo enfoca inicialmente riba Directie Financiën.

E rapport tambe ta indica cu Aruba ta moviendo pa un reorganizacion mas amplio di su funcionnan di tecnologia di informacion y manejo di informacion. Recomendacionnan prepara pa ICTU, un organizacion consehero gubernamental Hulandes den ICT, ta propone un manejo gradual enfoca inicialmente riba solucion di e reto mas urgente den manejo di ICT. Ta spera cu un restructuracion mas amplio di ICT y informacion lo ser incorpora den e reorganizacion general di Directie Financiën.

Reformanan den manejo di presupuesto tambe a haya impulso. Segun e rapport, structuranan di planning y control nobo ta ser incorpora caba den preparacion di presupuesto nacional 2027. Autoridadnan ta bisa cu e manejo revisa ta busca pa fortalece e conexion entre obhetivo di politica y asignacion di presupuesto mientras ta ofrece mas informacion multi-anual tocante gasto y resultado di desempeño.

Gobierno ta describi e medidanan aki como parti di un esfuerzo mas amplio pa mehora calidad di tumamento di decision publico y sigura cu recursonan financiero ta alinea cu prioridadnan di politica. E rapport ta nota cu proceduranan mehora pa preparacion, modificacion y rindimento di cuenta di presupuesto actualmente ta sigui manera planifica.

Na mesun momento, algun trayecto di reforma ainda ta den fase inicial. Trabao riba un programa di cambio di manejo financiero ainda no a cuminsa, mientras cu rediseño di estructura organisacional di Directie Financiën ainda ta pendiente.

E rapport tambe ta pone enfasis riba esfuerzo continuo pa mehora administracion di subsidio y ciclo di politica financiero relaciona cu subsidionan y adkision. Autoridadnan a reconoce cu falta di suficiente capacidad di personal a baha velocidad di mehoracionnan aki, cu e enfoca actual centra riba limpiamento di registracion di subsidio y fortalecimiento di control di fluho di trabao.

En general, gobierno ta presenta reformanan di manejo financiero como un transicion for di formulacion di politica pa implementacion practico. E rapport ta declara cu administracion di Aruba a cambia su enfoca cada bes mas di rumbo pa ehecucion y incorporacion sostenible di reformanan den institucionnan publico y legislacion.

Mientras cu e rapport ta enfatisa cu hopi proyecto ta sigui den ruta, e ta subraya tambe cu compromiso politico continuo, suficiente personal y aprobacion legislativo na tempo lo ta esencial pa mantene momentum. Varios proyecto ta depende di otro, loke ta nifica cu retrasonan den legislacion fundamental of restructuracion institucional por crea efecto riba e programa mas amplio di reforma.

E capitulo tocante manejo financiero finalmente ta presenta un cuadro di progreso cauteloso. Aruba a avansa cu varios reforma structural, a introduci mecanismonan di supervision nobo y a modernisa parti di su sistema di presupuesto y control, pero ainda ta enfrente obstaculo operacional y legislativo cu por determina si e reformanan lo logra nan impacto desea riba transparencia, responsabilidad y gobernacion fiscal.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figueroa (closer editor)

Leo Maduro
Dilma Arends
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop
Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Francis Dirksz

Colaboracion

Agence France Press
Ret Karibense
Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800
Email: noticia@bondia.com
aviso@bondia.com
info@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Tras di cifra conoci... Kico mas tin...?

**Cada tanto tempo nos ta publica sagra-
damente e cifranan cu nos Oficina Cen-
tral di Estadistica (CBS) ta produci. Nos
no tin motibo pa duda di nan veracidad,
pero esey ta henter e storia? No tin un re-
alidad mas compleho tras di e cifranan di,
por ehemplo 'bestaansminimum' y sala-
rio minimo? Nos ta dispone realmente di
e informacion mas detaya tocante e asun-
tonan aki pa por delinea mihor maneho
concreto? Y tin mas tereno unda nos
ta carece di e informacion adecua? Un
vistazo.**

Pa keda na e ehemplo menciona, cada tanto
tempo nos por constata con ta para cu e dife-
rencia entre e minimo necesario pa subsisti y
e salario minimo, manera e ta actualmente. E
diferencia ta solamente creciendo y nos por
tuma nota tambe di preocupacion na nivel po-
litico pa e asunto. Entre salario minimo pa un
persona cu ta traha 40 ora pa siman, e salario
ta Afl. 2.007,05, mientras e minimo di subsis-
tencia ta Afl. 654 mas halto. Un famia di cu-
atro persona mester di Afl. 5.602 actualmente
pa subsisti. Dos salario minimo ainda ta laga
un abismo di Afl. 1.574 pa cubri. Como lec-
tor bo por keda mas, o menos impresiona pa
e cifranan aki, pero kico realmente nos a haya
sa? No ta importante por ehemplo haya sa cu-
anto hende den nos comunidad ta cay cu nan
famia bao di e 'linea cora' aki? Bo por imagina
cu tin un grupo considerable cu ta yega net na
e limite di subsistencia menciona, pero nada
mas. Cuanto nan ta? Y mas en general, unda
nos por haya estadistica cu ta reuni dato di in-
greso cu dato di hogar pa duna un imagen con-
fiable di e situacion den nos comunidad? Esaki
por yuda nos pa anticipa, den caso di un caida
economico, cuanto famia lo ta den e zona di
peligro inmediato. Lamentablemente ta re-
sulta masha dificil pa haya e informacion aki,
y sigur di fecha recien. No cu e datonan indi-
vidual no t'ey pero ningun medio di comuni-
cacion tin e recursonan humano pa elabora e
tipo di estadistica nan mes. Ademas, lo no ta
normal cu instancianan gubernamental lo haci
esaki? Pasobra no ta solamente prensa lo por
duna mihor informacion na publico, pero sec-
tor priva lo por haci uso di esaki pa por plani-
fica nan actividadnan mihor. Pero nos no tin
pakico djis critica o lamenta e asunto; nos por
bay mas den detaye kico ta necesario pa esaki.
Por ta hasta cu gobierno ta haci uso di e tipo
di informacion, pero obviamente no ta duna
publicidad na esaki; esey lo mester cambia
anto. Kico mester pa esaki? Informacion con-
tinuo den forma digital di tur persona emplea,
incluyendo nan salario. Pa por acopla informa-
cion na famia, ta necesario cu cada base di dato

gubernamental ta opera cu e mesun sistema y
estructura, cu codigo di adres, empresa y profe-
sion uniforme. Pa kita preocupacion mes ora
di esnan cu tin miedo pa informacion individ-
ual sali, ta trata aki solamente di informacion
consolida cu no ta contene ningun dato per-
sonal ni di empresa.

Pero esey no ta tur. Talvez ta pensa cu ta trata
aki atrobe di un medio di comunicacion cu
kier satisface su curiosidad, pero esey no ta e
caso. Por ehemplo, e datonan aki por yuda de-
tecta con grandi e grupo ta cu lo mester atende
den un proximo proyecto di vivienda popular
y kico ta en general nan capacidad financiero.
Esaki na su turno ta importante pa no construi
na un nivel di prijs unda di antemano por sa
cu un grupo grandi no lo por afford loke ta
ofrece. Datonan di e tipo aki tambe por yuda
pa crea un sistema di transporte publico mas
adecua pa e ciudadano cu mester esaki. Ta facil
pa keda pinta nos isla como un paraiso tropi-
cal, unda bo ta conta como ciudadano si bo tin
bo propio auto. Y e otro, 'nan cuenta' con
nan ta haci? Tin otro opcion tambe: crea e in-
fraestructura pa 100.000 auto priva y subsidia
gasolin te den infinito, y bo no ta tende ningun
hende keha mas... Algo pa gana voto cune...?

Inversion den prioridad social

Pero, en serio, si nos ta desea di atende e prob-
lema grandi di salario cu no ta alcanza pa cubri
necesidad primario di un grupo asina grandi,
lo mester cuminsa pensa totalmente diferente.
Obliga henter nos economia aumenta salario
minimo drasticamente lo no ta solamente difi-
cil pa posicion competitivo di e sector motor,
pero lo causa mas inflacion ainda, anto genera
localmente, mientras nos lo ta importando
bastante inflacion di exterior caba, sigur den
e situacion mundial actual. Finalmente, e ci-
udadano di ingreso modesto ta keda mes leu
y Aruba lo bira un destino turistico mas caro
ainda. Ta p'esey ta importante pa gobierno, cu-
alkier gobierno, scoge meta strategico di me-
horacion di bida, cu no ta contribui mesora na
mas inflacion. Dentro di e obhetivonan po-
tencial di gran valor nos por indica: vivienda,
transporte publico, awa y energia electrico,
tur na un nivel pagable. Nos ta tende regu-
larmente comentario tocante loke gobierno lo
por haci cu e surplus presupuestario crea. Bo
por gasta gran parti di esey pa aumenta entrada
di e ciudadano den forma di subsidio, pero
por fabor no yam'e un 'inversion'. E ingreso
extra ey ta bay na consumo, di cual gobierno
oportunamente ta ricibi un parti back como
impuesto. Bon 'business' anto? Simplemente
e no ta permiti bao di e actual acuerdo di su-
prvision, unda e surplus mester bay sea na paga
debe, sea na inversion berdadero. Esaki lo ta e
prioridadnan anto.


Ombudsman di Aruba a participa den IOI Board of Directors Meeting 2026 na Corsou

Ombudsman di Aruba, mr. Sra. Jurima Bryson a participa den e International Ombudsman Institute (IOI) Board of Directors Meeting cu a tuma luga na Corsou for di 10 te cu 13 di mei 2026.

Durante e reunion internacional aki, Ombudsmannan di diferente pais a reuni na Corsou pa discuti desaroyo actual, colaboracion y futuro di institutonan di Ombudsman na nivel mundial.

E bishita di trabao aki a cuminsa cu un reunion informal unda participante di diferente paisnan a haya oportunidad pa intercambia experiencia y fortalece contactonan internacional.

Durante e reunion oficial di IOI Board of Directors, diferente tema importante a wordo trata, incluyendo asunto financiero, colaboracion internacional, digitalisacion,



uso di AI y fortalecimiento di institutonan di Ombudsman mundialmente. Tambe ta tin votacion pa tuma decision tocante e puntonan cu a trata den e reunion.

Participacion den e reunion aki a duna Ombudsman di Aruba e oportunidad pa participa den discusionnan y decisionnan riba tarima internacional, intercambia ex-

periencia y best practices, y representa e interesnan di pueblo di Aruba dentro di e red internacional di Ombudsman.

Sra. Bryson den su rol di Director Regional di IOI a participa tambe den e reunion di region di Caribe y Latino America.

Durante e reunion aki, a papia, entre otro, tocante colaboracion regional, training, subsidionan y sosten pa institutonan di Ombudsman mas chikito den e region.

Sra. Bryson kier felicita Ombudsman di Corsou, Sr. Keursly Concincion y su team pa un reunion internacional exitoso.

E reunion internacional di IOI a trece informacion valioso tocante desaroyonan internacional y metodonan innovativo den e institutonan di Ombudsman, cu por contribui na fortalecimiento di servicio y colaboracion den region.

Segun partido MEP:

Minister Geoffrey Wever a exige MEP pa retira for di un reunion di KvK tocante HOFA

Dialuna 25 di mei, KvK a invita henter Parlamento di Aruba pa un reunion, un invitacion cu a wordo extendi despues di un reunion cu gremionan comercial den sala di parlamento e mesun dia.

Parlamentario Evelyn Wever-Croes, Rocco Tjon y Dangui Oduber a acepta e invitacion pa asisti na e reunion unda gremio comercial lo scucha presentacion di Minister Wever y unda nan lo por comparti nan bista y posicion riba e Rijkswet Financieel Toezicht Aruba (HOFA).

Como representantenan di pueblo di Aruba, y como fraccion cu desde e prome dia a para na banda di pueblo cu a rechasa HOFA masalmente, nos a considera esaki un oportunidad legitimo y necesario pa scucha directamente e perspectiva di e sector comercial riba un asunto cu ta afecta nos autonomia como pais.

Na nos yegada na KvK, nos a wordo ricibi cu un caluroso bon bini.



Tur cos a cambia ora Minister di Finanzas Geoffrey Wever a yega.

E minister a exige formalmente di e board di KvK cu nos representantenan di pueblo di Aruba mester bandonan e auditorium. Su menasa tabata cla: si nos no sali, e no lo duna su presentacion.

E board di KvK, poni on the spot y bou presion di e minister, a cumpli cu e exigencia. Nos a respeta e decision di

e board y nos a sali di forma digno y sin incidente. Sin embargo, nos no por keda keto riba loke a pasa awe.

Un minister di finanzas cu ta uza su posicion gubernamental pa exige e exclusion di parlamentario den sala, den un espacio civil y independiente, riba invitacion di e instancia mes, ta crusando un liña importante.

Esaki no ta un asunto di protocol of preferencia personal.

Esaki ta un cuestion di principio democratico.

Nos kier ta cla riba un punto: nos no tabata eynan pa confronta e minister. Nos tabata eynan pa scucha e gremio comercial, exactamente pa loke KvK a invita nos.

Minister Wever mes a converti e situacion den un confrontacion door di exige nos salida.

Y esaki nos laga un pregunta colga pa pueblo di Aruba: Si HOFA ta asina bon pa nos pais, pakico e minister di finanzas no por defend'e den presencia di representantenan di e mesun pueblo cu e ta goberna?

Un berdad cu ta fuerte no tin miedo di pregunta. Un minister cu ta convenci di su caso no tin cu silencia e oposicion pa presenta su caso.

Pa esaki, nos ta exige Minister Wever pa si e realmente kier ta transparente no solamente papia di e beneficiar di HOFA, pero tambe papia abiertamente di e prijs cu nos como pais mester paga. Papia

di loke nos ta perde.

Papia di loke nos tin cu entrega. Papia di e consecucionan pa nos autonomia, pa nos finanzas, y pa nos pueblo.

Transparencia real no ta selectivo. Un gobierno cu ta goberna pa pueblo no tin cu scoge kico pueblo por scucha y kico no.

Nos ta urgi Minister Wever pa haci su presentacion riba HOFA disponibel publicamente, tur e cifranan, tur e argumentonan, tur e proyectonnan, pa cada ciudadano por husga pa nan mes.

Si e ta convenci cu HOFA ta den e miho interes di pueblo di Aruba, laga pueblo husg'e.

Fraccion MEP lo sigui para firme pa e derecho di pueblo di Aruba pa sa, pa scucha, y pa participa den decisionnan cu ta afecta nan futuro.

Nota di redaccion: E articulo aki ta opinion di e autor y no ta representa opinion di Bon Dia Aruba.

Bangladesh ta investiga morto di seis baby recién naci den hospital

(AFP)—Minimo seis baby recién naci a muri den e mesun sala di hospital na Bangladesh dentro di par ora diaranson, oficialnan di salud a bisa, kende a cuminsa un investigacion.

E babynan recién naci, cu edad entre un y tres dia, tabata den sala despues di parto di Hospital Ad-Din, un facilidad priva den capital Dhaka.

“Un investigacion ta andando, y nos mester poco tempo pa determina e causa di e mortonan,” director di hospital Nahida Yasmin a bisa periodistanan.

Hefe di departamento di salud di gobierno, Prabhat

Chandra Biswas, a nota cu e airco den e sala no tabata trahando den oranan tempran di diaranson, mientras temperatura na Dhaka tabata casi 32 grado.

“No tin ventilacion alternativo ora e airco ta paga,” el a bisa periodistanan, bisando cu e atmosfera den sala tabata sofocante.

Un baby a bira malo y a ser hiba pa unidad di cuidu intensivo, pero un ora despues nan a trec’e back den e camber.

Rond di mainta trempa, cinco otro baby tabata malo. “Tur a ser poni riba ventilador pero no por a ser salba,”

Yasmin a bisa. Vocero di departamento di salud Zahid Raihan a bisa cu informacion inicial no ta indica ningun maltrato como causa di e mortonan.

“Departamento di Investigacion Criminal ta... test si tabatin algun fayto tecnico den e airco of algun aparato electrico,” el a bisa.

Janu, un muher di 55 aña kende su nieta tabata entre e seis baby morto, tabata sinta na entrada di hospital cu un culpa chikito lora den paña

“Mi nieta tabata perfectamente bon te anochi,” el a bisa AFP. E babynan “a bira blauw un



tras di otro... Nos a hib’e [su nieta] pa ICU y despues nos a ricibi su culpa,” Janu a bisa.

Otro famianan na hospital tabata parce nervioso, cu algun hende bisando cu nan tabata

considerando transferi nan yiu na otro lugar. “Mi nieta ta den ICU pa 19 dia den condicion critico — mi no sa kico mi mester haci,” Mohammed Harun a bisa AFP.

Consejo di Salud Hulandes ta rechasa inclusion di vacuna contra meningococo B den programa nacional

(NLTimes)—Consejo di Salud a conseha cu vacunacionnan contra meningococo B ainda no mester ser agrega na e Programa Nacional di Inmunizacion di Hulanda. Den su recomendacion na minister di Salud Sophie Hermans, e consejo ta argumenta cu e beneficio actual di e vacuna no ta supera su posible desbentahanan.


Consejo di Salud ta nota cu infeccionnan di meningococo B actualmente ta relativamente incomun y cu no ta cla cuanto caso vacunacion realmente lo preveni. E tambe ta señala cu e vacuna frecuentemente ta causa keintura, cual

den baby por ocasionalmente resulta den hospitalisacion.

RIVM ta reporta cu e enfermedad ta afecta principalmente muchanan bao di cinco aña.

Consejo di Salud anteriormente tambe a emiti recomendacionnan negativo similar tanto na 2018 como na 2022. Ministerio di Salud, Bienestar y Deporte a pidi un evaluacion nobo, e biaha aki basa riba conocimiento actualisa tocante con e enfermedad ta plama y e vacunacion actualmente disponible.

Enfermedad di meningococo B ta, segun website di Rijk-



sinstituut voor Volksgezondheid en Milieu (RIVM), causa pa un bacteria yama meningococo. E bacteria aki por causa intoxicacion di sanger of meningitis.

Na maart, Reino Uni a experiencia un brote di meningococo B cu a ser confirma den minimo 20 caso, cu dos morto reporta. E personanan afecta tur a bishita un club nocturno na Canterbury mas

tempran e luna ey.

Centro Europeo pa Prevencion y Control di Enfermedad ta nota cu gruponan di infeccion di meningococo tipicamente ta asocia cu situacionnan unda grupo grandi di hende ta reuni.

Mientras personanan infecta por transmiti e enfermedad via contacto cerca, e plamamento no ta mesun rapido manera infeccionnan respiratorio transmiti via aire manera COVID-19.

Datonan di RIVM ta muestra cu 121 persona na Hulanda a ser diagnostica cu infeccion di meningococo B na 2024.

Grado di morto den brote di Ebola na Congo ta bao di 25%, segun WHO

(AFP)—E brote mortal di Ebola cu ta plamando na Republica Democratico di Congo actualmente tin un tasa di morto di menos cu 25 por ciento — hopi mas abao cu den otro brotenan reciente, un actualisacion di WHO a mostra.

Desde cu e brote a ser declara na Congo mita di mei, Organizacion Mundial di Salud a registra mas cu 1.000 caso sospechoso y confirma di Ebola den e pais Centro Africano.

Entre nan tin 10 morto confirma pa Ebola y otro 223 sospecha di ta relaciona cu e virus, segun un actualisacion publica pa WHO riba X diaranson, pero cu fecha di 24



di mei.

Un persona tambe a ser confirma morto pa Ebola na Uganda, cu seis otro caso confirma di infeccion den e pais ey, e actualisacion a muestra.

E agencia di salud di Na-

cionnan Uni a adverti cu e berdadero plamamento di e virus, cual ta sospecha di a circula den silencio pa algun tempo, ta probablemente hopi mas amplio.

E actualisacion di WHO a enfatisa, sin mas splicacion, cu e tasa di morto te awor

entre e casonan sospechoso tabata 24,6 por ciento, mientras entre e casonan confirma e tabata 9,8 por ciento.

Esaki ta significativamente mas abao cu den e 16 brote anterior di Ebola cu a golpia Congo desde cu e enfermedad a ser identifica aya pa prome biaha na 1976.

Mayoria di e epidemianan ey a ser causa pa e variante Zaire di Ebola — cual tipicamente tin un tasa di morto di 60-90 por ciento y ta e unico variante pa cual tin vacuna disponible.

E variante menos comun Bundibugyo, pa cual no tin vacuna of tratamiento aproba, ta responsable pa e brote ac-

tual.

E tasa di morto den e dos brote anterior na Congo cu a envolver e variante ey, na 2007 y 2012, a varia entre alrededor di 30 te 50 por ciento.

Pero e tasa di morto tipicamente ta evoluciona y por baha durante curso di un brote, mientras caso ta ser detecta mas rapido y cuidu ta ser brinda mas tempran, Abdi Rahman Mahamud, director di alerta y respuesta di emergencia di WHO, a splica siman pasa.

“Referencia trempa y cuidu trempa ta salba bida,” el a bisa periodistanan.

Corte Supremo Hulandes ta finalisa confiscacion di mas cu 667.000 florin den caso di trafico humano na Corsou



(CuracaoChronicle)—Corte Supremo di Hulanda a dicta definitivamente cu e doñonan tras di club nocturno La Tasca na Corsou mester paga mas cu 667.000 florin den ganashi ilegal na gobierno, cerando finalmente un di e casonan di trafico humano mas prominente di e isla den ultimo añanan.

Segun veredictonan anterior di Corte Comun di Husticia di Aruba, Corsou, Sint Maarten y di Boneiro, Sint Eustatius y Saba, e pareha condena a gana e placa via trafico humano na gran escala, trafico di migrante y empleo ilegal di muhernan Venezolano na un club noc-

turno localisa na Otrobanda. A reporta cu e muhernan a ser treci Corsou sin documentacion valido y emplea como asina yama “trago girls,” kende nan rol tabata motiva clientenan cumpra cantidad grandi di alcohol. Fiscalnan tambe a declara cu servicionan sexual tabata forma parti di e actividadnan rond di operacion di e club.

Corte Supremo a rechasa e apelacion di casacion di e pareha diamars sin emiti un splicacion substancialmente detaya, lagando e veredictonan anterior completamente intacto.

E caso a bira ampliamente conoci na Corsou como “Caso Venus.”



Investigacion y arestonan conecta cu e club nocturno ya a hala atencion publico na 2019, ora reportahenan a sali cu un di e sospechosonan supuestamente a purba soborna polisnan durante e investigacion den un esfuerço pa influencia inspeccion y accion di cumplimiento.

Durante e proceso hudicial, mas detaye a sali tocante e condicion di bida y trabao di e muhernan Venezolano involvi.

Segun fiscalnan, e muhernan tabata obliga pa traha seis te siete dia pa siman, hopi biaha te anochi laat. Supuestamente nan tabata obliga pa keda den un hotel cerca y tabata ser man-

teni financieramente depende ki debe nan tin y descuento for di nan ganashi.

Eventualmente e pareha a ser condena na cuatro año di prison pa co-participacion den trafico humano, trafico di migrante y practicanan ilegal di empleo. E condenanan di prison ey ya tabata irreversible prome cu e ultimo decision di Corte Supremo.

E caso tambe a provoca un debate publico mas amplio tocante relacion entre industria nocturno di Corsou, cumplimiento di ley y corrupcion.

Durante audiencianan anterior, huesnan a critica abiertamente

polisnan cu frecuentemente tabata bishita clubnan nocturno unda muhernan Venezolano tabata traha, intensificando scrutinio tocante posible conexionnan entre crimen organisa y oficialnan publico.

Despues di e condenanan criminal, e pareha a purba door di proceso di casacion preveni confiscacion di e 667.000 florin. Abogadonan di defensa a argumenta cu Corte a inclui beneficio financiero conecta cu periodo of hechonan cu no tabata completamente comproba y a afirma cu cierto gasto operacional mester a ser desconta for di e suma confisca.

Corte Supremo a rechasa e argumentonan ey, dictando cu e kehonan presenta no a trece ningun pregunta legal nobo cu ta hustifica anula e veredictonan anterior.

Cu e decision ey, e orden di confiscacion awor ta final, terminando añanan di proceso criminal, apelacionnan y litigacion di casacion rond di caso La Tasca.

Starlink por haya licencia na Corsou pa juni 2026

(CuracaoChronicle)—Tin un gran posibilidad cu proveedor di internet satelital Starlink por oficialmente haya un licencia pa opera na Corsou desde juni 2026.

Segun desaroyonan local den telecomunicacion, regulador di telecom di e isla, Regulatory Authority Curaçao (RAC), ta spera pa oficialmente responde na comienso di juni riba aplicacion di licencia di Starlink.

Starlink, propiedad di empresario biyonario Elon Musk, ta ofrece internet satelital di alta velocidad door di plato



di satelite compacto y ta diseña specialmente pa areanan unda infraestructura tradicional di cable ta limita of no ta disponible.

Corsou ya ta aparece pa algun tempo como “coming soon” riba mapa oficial di cobertura global di Starlink. Sinembargo,

clientenan riba e isla ainda no por cumpra subscripcion oficialmente for di e website di e compania pasobra Starlink ainda no tin un concesion formal di operacion di RAC.

A pesar di e restriccion ey, hopi residente y compania ya

a haya manera pa usa e servicio door di cumpra equipo di Starlink den exterior, specialmente na Hulanda of Merca. Despues usarionan por activa e sistema via opcionnan di subscripcion di roaming of biahe di Starlink, cual ya ta funciona na Corsou sin interferencia tecnico.

Varios compania local di ICT tambe ta ofrece servicio di instalacion y apoyo pa sistemanan di Starlink riba e isla. Segun reportahenan, RAC recientemente a presenta preguntanan adicional na Starlink como parti di e proceso di revision regulatorio pa sigura un evaluacion pro-

fundo prome cu tuma un decision final.

Si aproba, Corsou lo sigui e ehempel di e islanan BES. Starlink oficialmente a ricibi un licencia di operacion di 15 año na Boneiro, Sint Eustatius y Saba fin di año pasa.

E posible yegada di Starlink ta ser sigui cuidadosamente den sectornan di empresa y tecnologia di Corsou, unda infraestructura di internet mas rapido y mas resistente cada biaha ta ser mira como importante pa crecimiento economico, trabao remoto, turismo y desaroyo digital.

Activista pro-Palestina absolve di financia Hamas den caso di terrorismo na Hulanda

(NLTimes)—Corte di Distrito di Rotterdam a absolve activista Palestino Amin A. di acusacionnan relaciona cu financia Hamas. Sinembargo, el a ricibi un sentencia condicional di seis luna di prison pa viola legislacion di sancion y pa sigui operacionnan di e organisacion prohibi Al Aqsa Foundation.

Al Aqsa Foundation a ser agrega

na lista di sancion di Union Europeo na 2003 pa alegacionnan cu e tabata colecta placa pa gruponan asocia cu Hamas. Amin A. a keda activamente involvi te 2011 cu un otro organisacion cu a sigui cu e trabao di Al Aqsa.

Fiscalnan a recomenda un condena di cuatro año di prison na april, acusando Amin A. di a provee mas cu 8 milyon euro na Hamas. Corte di Rotter-

dam a rechasa e argumento ey, bisando parcialmente cu e no por a descarta posibilidad cu e conclusionnan di un experto clave di fiscalia posiblemente a ser “politicamente influencia of di otro manera.” E huesnan a bisa cu esey no automaticamente a invalida e rapportnan experto como prueba, pero si ta nifica cu nan mester ser trata cu cautela.

Corte a bisa cu e pruebanan disponible no a comproba cu e organisacionnan caritativo cu a ricibi fondo colecta door di Amin A. tabata bao control di Hamas. Ningun di e gruponan ey a aparece riba lista di sancion Hulandes of Europeo.

Mientras e huesnan a reconoce cu nan no por exclui posibilidad cu parti di e placa posiblemente a yega na famia di miembro-

nan di Hamas cu a muri, nan a agrega cu mesun cos por ser bisa di otro fondonan cu ta drehta Gaza.

Corte a determina cu e obhetivo principal di e acusado tabata pa provee ayudo humanitario, “y no den ningun manera pa financieramente apoya Hamas of organisacionnan conecta cu Hamas.”

Ex-empleado di corte sentencia pa leak di data sensitivo

(NLTimes) - Corte di Distrito di Zwolle a sentencia Sana C. di Woerden na 4 aña den prison, incluyendo un termino suspendi di 1 aña atras, pa bende data di corte di Amsterdam su sistemanan. El a bisa cu e tabatin empleo na e sitio te cu su aresto den maart di aña pasa.

Corte tambe a conden'e pa extorcion di un homber cu el a conoce via circulonnan di wega di placa, notando cu e ta lucha cu adiccion na wega di placa.

Durante su huicio, C. a bisa cu su adiccion a push'e pa comete e ofensanan. Corte a dicidi cu e mester ricibi tratamiento como parti di e sentencia. E castigo ta igual na e sentencia recomenda pa



Ministerio Publico (OM).

C. aparentemente a manda e informacion na un homber sospecha di hunga un rol den varios explosion y incidentenan di cende sitionan na candela den Den Haag,

ademas di un tiroteo na un residencia na Waalwijk. Aparentemente e tabata conoce e sospechoso fugitivo via un primo. OM tambe ta persiguiendo e den e caso.

C. ta emplea na Corte di Dis-

tricto di Amsterdam desde augustus di 2022, trahando na e front desk central.

E extorcion a dura 2 aña, durante cual C. aparentemente a obliga e victima dun'e 100.000 euro via mensahenan

menasante di WhatsApp. El a bisa cu el a usa data di sistema confidencial di corte pa intimid'e, menasando daño na e y su famia, incluyendo su casa y yiunan, si e no cumpli.

Segun corte, e homber "mester a traha te cansancio y presenta placa pa cumpli cu e exigencianan," y a biba den miedo constante pa e seguridad di su yiunan. Corte a pone un orden di alehamento contra C. y a duna orden pa e paga compensacion na e victima.

C. a "abusa di su posicion y tabata motiva solamente pa su deseo di haya placa," corte a declara. "Den haci esaki, el a dañe reputacion y integridad di e hudiciario henter. Corte ta declara e acusado sumamente responsable pa esaki."

Segun prome minister Hulandes:

Relacionnan cu Merca a cambia "irreversiblemente" mientras Trump ta pidi China pa uni den lucha contra ICC



(NLTimes) - E relacion entre Hulanda, Europa y Merca a cambia "irreversiblemente," prome minister Rob Jetten a declara na ANP despues cu el a presenta un discurso tocante politica exterior di su gabinete durante e conferencia di seguridad di NextGen na Den Haag.

Esaki ta bin memey di informacion cu presidente di Merca Donald Trump a propone na su colega Chines, Xi Jinping pa nan uni cu Rusia den lucha contra e Corte Penal Internacional (ICC).

Si e rumornan ta berdad, Hulanda y Europa mester ta "hopi mas directo" tocante e menasa contra e corte y haci tur cos posible pa proteha esaki. Si Merca, China y Rusia uni contra ICC, "esey lo afecta e fundacion di e orden huridico internacional, cu ta asina importante den e mo-

mentonan aki."

Den su discurso na e conferencia di seguridad, Jetten a enfatisa tambe cu Hulanda y Europa mester bira mas independiente y tuma mas responsabilidad pa nan propio seguridad. "Pa hopi tempo, Europa a keda kere ingenuamente cu nos por keda semper bao di e paraplu di seguridad Mericano, cu poco gasto," el a bisa.

"Nos mester fortalece e cooperacion defensivo Europeo pa garantisa cu nos por defende nos propio continente. Nos mester haci esaki no pa aleha nos mes di Merca, sino pa haci e aliansa mas igual y, como resultado, mas fuerte."

Den e era geopolitico nobo aki, ta esencial pa construi coalicionnan nobo, segun Jetten, cu a enfatisa cu esaki lo nifica cu Europa mester ta mas pragmatico y menos ego-

ista den trato cu paisnan den e Sur Global, cu hopi biaha a sinti nan mes ignora of pasa pa un banda door di Europa. "Si nos kier fortalece nos economianan door di reduci nos dependencia riba actornan grandi y impulsa cooperacion cu otro paisnan, nos mester mira no solamente kico nos

por gana, pero tambe kico nos tin pa ofrece. Y esey ta hopi."

"Pasobra si nos ta preocupa cu paisnan den e Sur Global ta mira mas den direccion di China y Rusia, e ora nos mester mira tambe nos propio rol den e proceso ey. Pa demasi-

ado tempo, otro perspectiva nan no a ser reconoce," Jetten a bisa. "Ta tempo pa nos reconoce esaki y tuma accion. Asina e estado di derecho ta funciona pa tur hende, y nos ta fortalece no solamente nos mes, pero otro tambe."

..... **AVISO**

 **DEBI NA MUDAMENTO POLI GINECOLOGIA LO TA CERA DIABIerna 29 DI MEI 2026**

DESDE 1 DI JUNI LOCALIDAD NOBO

POLI GINECOLOGIA





- Dr. Garcia
- Dr. Bos
- Dr. Moreta
- Dr. Blok



- Dr. Siemonsma
- Dr. Gomez
- Dr. Hamers

 **Caya J.E.M. Arends #17**
(Den mesun edificio cu Fundacion ABO)

 Dialuna pa diabierna  527-4130
8:00 am - 5:00 pm

 **Horacio Oduber HOSPITAL** | NOS SEMPER T'EY!

A sigura activo conecta cu red acusa di trafico humano y explotacion sexual na Honduras

(Infobae) - Autoridad a identifica vehiculo y propiedadnan di un estructura criminal acusa di trafico humano y explotacion sexual comercial.

Autoridadnan Hondureño ta avansa cu un caso di trafico humano despues di aseguramento di activonan conecta cu tres homber captura na april 2024 pa Direccion Policial de Investigacion (DPI). E investigacion ta apunta na un supuesto red dedica na explotacion sexual comercial y asociacion criminal, segun fuentenan policial.

DPI a identifica Harold Joseph Green Jr., William James Murdock y Ramón Gustavo Trejo Najera como doño di e activonan bao investigacion. E tres homber a ser aresta pa nan supuesto participacion den crimen relaciona cu trafico humano, segun e linea oficial di investigacion.

Investigadornan ta sostene cu e estructura lo a usa vehiculo y biennan inmobiliario como parti di su operacion: e activonan, supuestamente adkiri cu recursonan ilicito, lo a sirbi tanto pa sostene patri-

monio di e grupo como pa facilita y tapa actividadnan bao investigacion, segun reportenan preliminar di autoridad.

Activonan sigura

E investigacion a origina den trabao di inteligencia di e unidad anti-traffic conecta cu Direccion Policial de Investigacion, cu a reuni informacion riba operacion di e organizacion y su posible fuentenan di financiamiento, segun autoridadnan involvi den e caso.

Segun e investigacion ey, e red lo a implementa mecanismo pa simula actividadnan legal y sconde origen y control real di activonan supuestamente usa pa facilita actividadnan ilicito. E hipotesis policial ta inclui uso di instrumentonan pa haci identificacion di beneficiario final mas dificil.

Den e contexto aki, e proceso a permiti localisa un serie di activo conecta cu e acusadonan, incluyendo vehiculonan y biennan inmobiliario, cu lo a ser cumpra cu recursonan di origen ilicito, segun DPI.

Supuesto red di trafico hu-

mano

Segun reportenan preliminar cita pa investigadornan den e caso, e organizacion lo a usa plannan corporativo y mecanismonan financiero cu apariencia di legalidad pa complica rastreo di placa y movimiento di recursonan supuestamente obteni pa medio di actividadnan criminal.

Fuentenan di investigacion ta sostene cu e practicanan aki lo a permiti e estructura opera di manera discreto y duna apariencia legal na operacionnan conecta cu explotacion sexual comercial. E investigacion ta busca establece e rol di cada acusado y e manera den cual a mancha activonan.

Autoridadnan tambe ta sospecha cu parti di e activonan aki a funciona como sosten logistico: un manera pa sostene e operacion y, na mesun tempo, sconde su actividad, segun e linea di investigacion cu ta den curso.

Trafico humano na Honduras

Trafico humano ta keda entre e crimennan cu mas ta preocupa agencianan di seguridad y defensornan di derechonan



humano na Honduras, specialmente pa motibo di su impacto riba muhe y mucha muhe y otro personanan den condicion vulnerabel, segun autoridad y organisacionnan cu ta monitor e fenomeno.

Den ultimo añanan, institucionnan di seguridad Hondureño a reforsa operacion y procesonan di investigacion dirigi pa desmantela rednan conecta cu explotacion

sexual, trafico humano y crimennan asocia cu crimen organisa, segun informacion oficial.

Den e contexto aki, aseguramento di activonan ta forma parti di un strategia pa reduci capacidad economico di e estructuranan aki y preveni cu nan sigui opera cu recursonan ilicito, fuentenan policial a indica.

Dependencia di Costa Rica riba importacion di bonchi ta yega 80%

Infobae) - Universidad Nacional ta adverti cu produccion nacional di bonchi apenas ta cubri 20% di demanda domestico, loke ta laga e pais vulnerabel na fluctuacionnan internacional y riesgonan climatico.

Dependencia di Costa Rica riba importacion di bonchi a yega nivelnan sin precedente, lagando produccion nacional den un situacion di vulnerabilidad nunca mira prome, segun un analisis publica den diario Costaricense El Observador.

Segun datonan publica den e nota, Universidad Nacional (UNA) a adverti cu e pais solamente ta logra cubri 20% di su demanda domestico, mientras e resto ta bini principalmente for di Argentina, Brazil y Merca.

E fenomeno no ta limita na un cifra so. Segun UNA, e produccion local actual apenas ta cubri dos luna di consumo nacional prome cu yegada di bonchi importa bira

necesario.

E buraco aki den suministro ta laga e poblacion exponi na factornan externo cu e pais no por controla, convirtiendo loke tabata un asunto agicola den un asunto strategico di seguridad alimentario.

Caida abrupto den siembra y abandono di productornan Entre 2018 y 2025, e area dedica na cultivo di bonchi a baha for di 16.000 te solamente 9.000 hectar.

Segun Rafael Evelio Granados Carvajal, academico na Escuela de Ciencias Agrarias di UNA, miles di productor a bandona e actividad, specialmente den regionnan Hueta Norte, Brunca y Chorotega, areanan historicamente conecta cu cultivo di grano.

Deterioro di e sector ta splica pa un combinacion di factornan. Na un conferencia di prensa "Benta abao di bonchi ta lanta alarma tocante inseguridad alimentario," universidad a señala cu debilitamento di politica publico

y reduccion di investigacion desde añanan 1990 a marca e cuminsamento di e crisis.

Vulnerabilidad na mercado internacional y perdida di biodiversidad

Dependencia riba importacionnan, cual ta supera 80%, ta pone Costa Rica den un posicion fragil. Cualquier interrupcion den mercadonan internacional, manera aumento di prijs of restriccionnan di exportacion, por afecta acceso na e alimento basico aki.

UNA tambe a adverti tocante un otro riesgo: perdida di biodiversidad genetico. "Desaparicion di variedad local di bonchi ta implica perdida di capacidad pa adapta na condicionnan propio di pais," Granados a splica.

Ademas, el a enfatisa cu desaroja un simia nobo ta rekeri seis aña di investigacion, pero despues di cinco aña di uso, patogenonan por limita su uso, loke ta complica sostenibilidad productivo ainda mas.



Impacto di cambio climatico y solucionnan propone

Cambio climatico a haci e crisis mas grave. Desde añanan 2010, yobida extremo a destrui cultivo y material genetico local, segun evaluacion di UNA. E fenomeno aki ta aumenta dependencia riba simianan importa y ta reduci resistencia nacional dilanti desafionan ambiental.

Pa drecha e tendencia, UNA ta propone diversifica fuentenan di suministro y fortalece

investigacion den simianan resistente. Nan tambe ta recomenda rebalorisa bonchi Costaricense, destacando su balor nutricional, su vingerprint di carbon mas abao ora nan ta ser produci localmente y su contribucion na empleo rural. E situacion di bonchi na Costa Rica, segun universidad, ta un ehempel cla di con seguridad alimentario ta depende tanto di decisionnan interno como di capacidad pa responde na factornan global y ambiental.


Delcy Rodriguez a encarga dos funcionario cu rediseño di aparato estatal Venezolano

(Infobae) - Presidente interino di Venezuela a crea dos comision presidencial pa reforma estructura di gobierno y optimalisa maneho financiero, den marco di e cambionan cu el a promove desde caida di Maduro.

Presidente interino di Venezuela, Delcy Rodriguez, a anuncia diamars e creacion di dos comision presidencial encarga cu rediseña funcionamiento di e Estado, den loke ta representa e paso mas ambicioso di su administracion desde cu el a tuma poder despues di captura di Nicolas Maduro na januari.

E anuncio a bin durante un reunion di Consejo di Ministronan na Palacio Miraflores na Caracas, y a ser transmiti pa canal estatal Venezolana de Televisión.

E presidente a nombra vicepresidente sectorial pa Socialismo Social y Teritorial y Minister di Educacion, Hector Rodriguez, como comisionado presidencial pa restructuracion y reingenieria gubernamental. Vice-presidente sectorial di Planificacion, Ricardo Menendez, lo traha cune den un periodo maximo di 90 dia pa presenta



un plan integral pa reforma di administracion publico na Consejo di Minister.

Na mesun momento, el a nombra minister di Poder Popular pa Economia, Finanzas y Comercio Exterior, Anabel Pereira, como comisionado presidencial pa maneho eficiente di gobierno nacional.

E presidente no a especifica si e reforma lo involucra fusion di ministerio, eliminacion di agencia of cambio den vicepresidencia di cada sector. Pero el a laga e meta central cla: adapta estructura di e Estado na loke el a yama e “realidad nobo di Venezuela”, un expresion recurrente desde cu el a tuma cargo pa distan-

cia su mes for di modelo di maneho di su predecesor. E sesion di Consejo di Minister no a inclui ningun referencia na alcance specifico di e cambionan of e cantidad di institucionnan cu por ser afecta.

Nombramento di Hector Rodriguez como lider di e reforma ta responde na un perfil defini.

Politico cu un carera largo dentro di Chavismo, e tabata gobernador di estado Miranda entre 2021 y 2026, cu experiencia den maneho territorial y mobilisacion di partido. Anabel Pereira tin un carera largo den administracion financiero publico: prome cu tuma ministerio di Economia

na augustus 2024, el a traha na Fondo de Proteccion Social para Deposito Bancario (Fogade) y Superintendencia di Institucionnan di Sector Bancario (Sudeban), e organismo regulador di banco Venezolano.

Rodriguez a asumi e presidencia ordena pa Corte Supremo di Husticia (TSJ) riba 3 di januari, despues di e captura di Maduro durante un operacion militar di Merca na Caracas.

Desde e momento ey, su administracion a ser marca pa un cambio pragmatico sin precedente den historia di movimiento Bolivariano: el a reanuda relacionnan diplomatico cu Washington despues di siete aña di ruptura, a habri pais pa capital stranhero, a firma acuerdonan energetico y minero cu Merca, a libera centenares di prisionero politico y a destitui un gran parti di gabinete hereda, incluyendo liderato militar.

Durante mas cu dos decada, Chavismo a construi un aparato estatal di dimension enorme: decenas di ministerio, vice-presidencianan di sector, institutonan autonomo y empresanan estatal crea den diferente ola di revolu-

cion Bolivariano.

Esaki a muestra sintomanan di collapse funcional durante e añanan mas duro di sancionnan internacional, entre 2017 y 2023, ora economia Venezolano a contrae cu mas cu 70% segun calculacionnan di Fondo Monetario Internacional.

E restructuracion anuncia tambe ta bin na un momento unda Venezuela ta avansa den normalisacion di su debe externo. Na mita di mei, regimen Chavista a anuncia cuminsamento di un proceso di restructuracion di debe publico y di Petróleos de Venezuela (PDVSA) dilanti FMI, un organizacion cu cual e pais a kibra relacion na 2019. Resultado di e negociacion aki lo condiciona margen fiscal disponibel pa cualquier reforma di aparato administrativo.

Cu e plaso di 90 dia, e propuestanan mester ta cla rond di fin di augustus. Loke Rodriguez dicidi haci cu nan lo revela si e anuncio aki ta habri un transformacion real di Estado Venezolano of si e reformanan ta keda riba papel mientras urgencia politico ta impone su propio agenda.

Protestanan na Bolivia: blokadanan ta causa miyones di perdida y ta agrava scarcedad den sectornan productivo clave

(Infobae) - E protestanan cu ta dura tres siman ya a afecta gravemente actividad economico nacional, dificultando suministro den ciudadnan principal y comprometiendo operacionnan logistico y industrial den mas cu mitar di territorio Boliviano.

Comerciantenan chikito, transportistanan y productornan Boliviano ta sali caya pa e blokadanan cu ta exige renuncia di presidente Rodrigo Paz, kende ta den cargo pa poco mas cu seis luna. E protestanan ta dura 21 dia y a expande pa seis departamento di pais, sin cu gobierno a muestra señalnan di solucion.

Como rechazo contra e mobilisacionnan aki, docena di nan a marcha diamars cu bandera blanco door di centro historico di La Paz cu lemanan manera “Nos kier traha” y “Pa motibo di e blokada nos ta den caya”. E manifestantenan, incluyendo

varios muhe Aymara, a camina den caynan rond di Plasa Murillo, cu tabata bao vigilancia di polis antidisturbio, aunke ningun no a bay den direccion di dje.

Lider sindical Miriam Hernandez a señala cu “varios negoshi a cera” pa motibo di e mobilisacionnan y scarcedad di alimento deriva for di blokadanan di caminda. “Nos ya ta cansa, hende humilde ta cansa,” el a bisa.

Sindicatnan di transporte tambe a realiza blokadanan di caya na La Paz diamars debi na scarcedad di combustible, agrava pa blokadanan di caminda cu ta impedi suministro for di distribuidornan. Algun sindicato di chauffeur a menasa di uni na protestanan si compensacion pa daño causa na nan vehiculonan pa gasolin malo bendi den prome lunanan di aña no ser acelera.

E mobilisacionnan ta ser lidera pa sectornan campesino

Aymara, Central Obrera Boliviana (COB) y simpatizantenan di ex-presidente Evo Morales (2006-2019). La Paz, El Alto y Oruro ta registra falta di suministro medico manera oxigeno medicinal, mientras miles di vehiculo ta keda tranca riba rutan nacional y internacional, incluyendo esnan cu ta conduci pa puertonan di Chile y Peru. Na Cochabamba, Jhasmani Medrano, presidente di Fundacion di Productornan di Lechi (Fundaprolec), a reporta cu e sector ta acumula perdidanan mas grandi cu 10 miyon Boliviano (alrededor di USD 1,44 miyon), cu un adicional di 2 miyon (alrededor di USD 289.000) pa cada dia di blokada. Mas cu 300 truck cu maishi, afrecho y casca di soya ta keda para riba camindanan blokia, sin por suministra productornan.

Como cu e no por ser almacenado, lechi “mester ser bendi e mesun dia,” segun Medra-



no. Frente na e situacion aki, Alcaldia di Cochabamba a autorisa benta di lechi, webo y flor den tres plasa publico den ciudad. Alcalde municipal Enrique Navia a especifica cu e productornan lo ser habilita for di 8:30 di mainta. Presidente di Federacion Nacional di Avicultornan, Marlon Alvarez, a adverti tocante un posible scarcedad di galiña den proximo simannan. Cochabamba ta move 1,2 miyon

galiña pa siman, pero varios granha ta cuminsa keda sin insumo y traslado di pushi di galiña chikito ta acumula retraso.

Den sector textil, Gladys Nieto, presidente di Bolivia Produce Regional Cochabamba, a reporta cu imposibilidad di cumpli cu entreganan y move mercancia durante tres siman di corte a genera perdida di USD 100.000.

Boxeador influencer aresta na Florida pa intento di hortamento



TMZ) - DeenTheGreat a pasa por lo menos parti di

su diaranson bao detencion na luga di den su livestream, pa motibo cu e boxeador influencer a keda aresta na Miami-Dade County.

Segun recordnan di prison, obteni pa TMZ, Deen - ken su nomber real ta Nurideen Shabazz - a keda aresta diaranson mainta y actualmente ta bao proceso na Turner Guilford Knight Correctional Center na Miami.

Recordnan ta muestra cu a aresta su persona bao cargo di intento di hortamento cu e cantidad pa

su fianza "bao determinacion ainda."

Segun reportahe di polis, oficialmente a responde despues cu un muhe yama Destiny Aleman a acusa cu Deen a purba di tuma su telefon despues di bah'e for di yate. El a bisa polis cu Deen a rabia pa motibo cu otro hombernan tabata purbando di papia cune, a pesar cu el a adverti di no papia cu niun hende mas. El a bisa cu na momento cu el a baha for di e yate, Deen a gar'e na su man y purba di kita su telefon, aparentemente lagando un rasca chikito na su

brasa den e proceso.

Aparentemente cos a escala for di aya ... polis a bisa e doño di e yate boluntariamente a entrega e imagennan di camara for di e propiedad. Polis a bisa cu video a muestra Deen ta grita pa un hende gara e muhe su telefon y sigura cu e no tabata grabando e, prome cu supuestamente el a pone man riba dje varios biha purbando di gara e telefon mientras e tabata purba di los.

Polis ta bisa cu e imagennan a muestra cu e muhe tabata riba

vloer purbando di stop Deen di coy su telefon prome cu eventualmente el a los.

E streamer ta conoci di haci colaboracion cu famoso 'looks-maxxer' Clavicular, pero a crea su siguimiento online cu stream viral, beef di internet y peleanan di boxeo di influencer, birando un di e personanan mas facil di reconoce den e mundo di pelea.

Te cu fin di aña pasa, DTG tabata ainda haciendo su trabao, streaming cu Tekashi 6ix9ine.

Potret di TMZ

Director di "The Revenant" Inarritu ta uni cu elite intelectual di Mexico

(AFP)—Director ganador di Oscar Alejandro Gonzalez Inarritu a bira e prome cineasta diamars pa uni cu e prestigioso Colegio Nacional di Mexico, cual ta reuni e elite intelectual di e pais.

E cineasta di 62 aña, ken a gana cinco Premio Oscar, a dirigi



hitnan incluyendo "The Rev-

enant", cu Leonardo DiCaprio, y "Birdman".

Colegio Nacional a reuni mas cu cien intelectual desde cu el a ser funda na 1943, for di escritornan te científiconan, incluyendo varios ganador di Premio Nobel.

"Door di scoge mi, mas leu di reconocimiento di mi tra-

bao personal, boso tambe a reconoce un arte y un tradicion," Inarritu a bisa durante su conferencia inaugural.

"Mexico ta un forsa visual pa-

sobra nos cultura semper a usa imagennan como un manera di splica cosnan di mundo," el a agrega.

John McClain, co-ehecutur di patrimonio di MJ, a fayece na edad di 71 aña

(TMZ)—John McClain, e co-ehecutur di patrimonio di Michael Jackson y un ehecutivo y productor veterano den industria musical, a muri, TMZ a haya sa.



Un representante di McClain a bisa TMZ cu John a muri diamars. Fuentenan cu conocimiento directo a bisa cu e tabata malo pa varios aña, aunke ainda no ta cla si e enfermedad a contribui na su morto. Nan a bisa cu el a muri na Malibu.

Banda di su rol como co-ehecutur di patrimonio di MJ — hunto cu John Branca — McClain a produci hitnan pa Michael, Janet Jackson, Ice Cube y Dr. Dre.

E tambe tabata un ehecutivo di A&R na A&M Records kende a supervisa e album di Janet, "Control," y a convence e label musical pa firma actonan nobo manera Marky Mark & The Funky Bunch di Mark Wahlberg.

McClain y Branca a ser nombra co-ehecutornan di patrimonio di MJ na 2009, despues di morto di Michael. Nan no a solamente saca e patrimonio for di e debe enorme di Michael, pero tambe a convertie den un imperio extremamente lucrativo, cu reportahenan indicando cu e ta balora na biyones di dollar.

Nan a lidera e biopic "Michael," e musical di Broadway, un produccion di Cirque du Soleil, y e pelicula "This Is It"... tocante preparacion di Michael pa su ultimo tour.

McClain personalmente a participa den produccion di hitnan postumo di Michael manera "Love Never Felt So Good" y "Much Too Soon."

John Branca, e co-ehecutur di patrimonio di Michael Jackson, a bisa TMZ: "Mi ta profundamente tristo cu e perdida di mi partner y 'ruman' John McClain. Un di e innovadornan mas grandi den mundo di musica y mercadeo musical, John tabata un visionario, mirando mas leu di loke ta ordinario y mirando den futuro."

El a agrega: "Ora nan a nombra nos den testamento di Michael, mi tabata sa cu e lo trece gran conocimiento tocante musica di Michael y cu su amistad y dedicacion pa Michael lo subraya tur e proyectonan cu nos por a trece na mundo. El a trece pasion y conviccion na tur cos cu el a haci y tabata un di mi amigonan mas generoso. Ta dificil pa imagina un mundo sin dje."

McClain tabatin 71 aña.

GAIA x JOHNNIE WALKER

AFTER DARK

JOIA
BY IBEROSTAR

Timesless Beats by Dj Yeimy
Elevated Cocktails and Refined Indulgence
Fridays from 9PM to 1AM

Reservations trough Opentable.com
GAIA House of Grill | JOIA Aruba by Iberostar
J.E. Irausquin Blvd 230

SETAR a firma acuerdo cu Telearuba como partner oficial den transmision di e weganan di Copa Mundial di FIFA 2026

E temporada tan gusta di futbol ta cla pa ranca sali y SETAR conhuntamente cu Telearuba ta cla pa transmiti tur e weganan di e Copa Mundial di FIFA 2026.

Diaranson mainta den presencia di Minister di Telecomunicacion, Sr. Rene Herde, y Minister di Deporte, Sra. Gerlien Croes, SETAR a firma e acuerdo cu Telearuba pa transmision di e weganan di e Copa Mundial di FIFA 2026, cuminsando diahuebs 11 di juni 2026. E prome wegá lo ta Mexico contra Sur Africa na Mexico City. E aña aki pa prome biaha e Copa Mundial ta tuma luga na tres pais, esta Mexico, Merca y Canada.

Na Aruba e fanaticada di futbol ta grandi y hopi ta en espera di e weganan, specialmente cu participacion di e Blue Wave di nos hermana isla Corsou cu pa prome biaha ta participa den e Copa



Mundial di FIFA.

Como nos compania nacional di telecomunicacion, SETAR ta mira e importancia pa ta un partner oficial den e transmision di e Copa Mundial di FIFA 2026 y pa trece e ambiente di futbol pa nos isla. Nos ta invita pueblo di Aruba completo pa disfruta di e weganan cu lo ser transmiti pa Telearuba na canal 23.



Ex-pareha di Nick Pasqual ta acus'e di agresion sexual



(TMZ) - "How I Met Your Mother" Nick Pasqual su pesadilla legal ta leu di caba, pa motibo cu su ex-pareha awo ta demandando e pa agresion sexual.

Segun documento di corte obteni pa TMZ, artista di make-up di Hollywood Allie Shehorn ta acusa cu Pasqual a agredi e sexualmente y viol'e durante un incidente den april 2024 mientras ambos

tabata den un relacion.

Den e documento, Shehorn ta acusa cu Pasqual a somet'e na "conducta controlador, manipulador, menasante y fisicamente violento" durante su relacion, acusando cu e abuso a escala durante tempo. E demanda tambe ta conta tocante e atake impactante di mei 2024 cu na final a resulta den Pasqual su condena criminal. Shehorn ta bisa cu Pasqual a drenta

su cas na Sunland den e oranan trempan di mainta y a stak'e mas di 20 biaha den su garganta, pecho, lomba, abdomen, brasa y pols - cu intencion di mat'e segun e documento.

Anteriormente e luna aki a condena Pasqual di intento di asesinato, hortamento residencial y otro cargonan conecta na e atake despues cu fiscalnan a bisa cu el a huy pa e frontera cu Mexico despues

di e incidente.

Segun e demanda, Shehorn a sobrevivir e atake despues di ricibi operacion di emergencia y tratamiento medico intenso, pero ta bisa cu el a keda cu heridananan permanente, trauma emocional y gastonan medico andando.

Awo e ta demandando pa argesion sexual, violencia di genero, agresion, causa sufrimento emocional y

Kanye West lo duna show na Istanbul

(AFP) - **Rapper Mericano Kanye West, ken su concierto a keda prohibi den varios sitio Europeo pa remarcanan controversial antisemitico, lo duna show na Istanbul dia 30 di mei segun organisadornan.**

E homber di 48 aña, tambe conoci como "Ye", a causa disgusto amplio pa su remarcanan cu ta glorifica lider Nazi Adolf Hitler y pa comentarionan antisemitico cu el a culpa riba su desorden bipolar.

Rapper Mericano Travis Scott ta anticipa di tambe participa den e evento diasabra na Istanbul su Ataturk Olympic

Stadium, organisador Erdem Karahan di ILS Vision a conta Anadolu su agencia di noticia estatal diamars.

Alrededor di 120.000 fanatico ta anticipa di ta presente na e evento estilo festival, cu e ciudad dependiendo riba 100 bus gratis pa hiba hende cas, CNN Turk a reporta.

West su declaracionnan extremo y accionnan - aña pasa el a lansa un cantica yama "Heil Hitler" cu t-shirt cu swastika bendi riba su website - a causa un cantidad di critica contra su tour plania pa Europa.

Den april, gobierno Britanico a prohibi su persona di drenta

den e pais pa encabesa e festival, obligando organisadornan cancela e evento.

Un siman despues, el a pospone un concierto na Marseille despues di reportahe cu Francia su minister di Interior tabata buscando blokia e concierto.

Un stadion Polaco a cancela West su concierto den plan pa dia 19 di juni, cu e minister di Cultura bisando cu Polonia tabata kier prohibi su persona pa su "promocion di Nazismo."

Despues. Club di futbol Suizo FC Basel a bisa AFP cu nan a rechasa un plan pa organisa un concierto di West.



Na januari, West a publica un aviso den Wall Street Journal pa defende us mes, bisando; "Mi no ta un Nazi ni un antisemita," y "mi stima Hudiunan." El a atribui su comportamento na un "episodio psicotico"

pa motibo di e desorden bipolar.

E ta den plan pa duna concierto na Hulanda dia 6 y 8 di juni, e capital di Albania Tirana dia 11 di juli y na Praga dia 25 di juli.

Segun comunicado di minister Gerlien Croes:

Mantencion di veldnan deportivo ta sigui na veld di Calbas, Duracell y Grasshoppers

Siguiendo e strategia pa un maneho sostenibel di instalacionnan deportivo na Aruba, Minister di Deporte, Sra. mr. Gerlien Croes, ta reafirma cu e plan di accion pa mantencion ta continua firmemente.

E prome trabaonan pa e aña aki a inicia cu mantencion integral di veld di Sabana Grandi, mientras cu trabaonan tambe a wordo implementa na veld di Calbas, Duracell y Grasshoppers, como parti di un plan amplio pa mehora y mantene infraestructura deportivo rond di nos isla.

E trabao ta wordo checuta den colaboracion estrecho entre Ministerio di Deporte y Ministerio di Infraestructura, hunto cu Departamento di Obran Publico (DOW). E ekiponan tecnico ta sigui traha di forma structural y periodico pa sigui-



ra cu veldnan y canchanan deportivo ta keda den condicion optimal pa uzo di comunidad y deportistanan.

E plan pa 2026 ta construi riba e base solido di e exito alcansa den 2025, unda mantencion sistematico a resulta den me-

horacion concreto na varios facilidadnan deportivo.

Minister Gerlien Croes a enfatisa cu mantencion ta un pilar esencial pa desaroyo deportivo: "Mantencion ta clave pa sostenibilidad. Nos ta kere den deporte como un in-



strumento di desaroyo social y un estilo di bida saludabel. Infraestructura na bon condicion ta esencial pa logra esaki. Nos ta comprometi pa sigui traha cu transparencia, planificacion y eficiencia pa sirbi nos comunidad manera e merece".

E continuidad di e plan ta enfoca riba implementacion di un sistema di mantencion preventivo y periodico, garantizando un uzo responsabel di fondo publico y maximalizando impacto positivo pa comunidad y deportistanan.

Memphis Depay y Jurrien Timber inclui den seleccion di Koeman pa Mundial mientras De Vrij ta keda afo

(NLTimes)—Memphis Depay y Jurrien Timber ta inclui den seleccion di Oranje di Ronald Koeman pa Mundial proximo luna na Merca, Canada y Mexico. KNVB a anuncia un seleccion final di 26 hungador. Marten de Roon y Guus Til tabata e selectadonan mas sorprendente den e grupo.

Timber a ser inclui den selec-



cion aunke ainda e ta recuperando di un lesion na su lies, cu e defensor di Arsenal acercando recuperacion completo.

Memphis Depay tambe ta den seleccion. E ex-delantero di PSV a drenta den accion atrobe pa Corinthians e siman aki despues di un periodo afo cu lesion.

"Mi ainda ta pensa cu Depay por contribui, pero e mester pasa e siguiente periodo den bon condicion," Koeman a bisa den un conferencia di prensa despues cu a anuncia e seleccion.

De Roon, awor 35 aña di edad, a hunga pa Oranje ultimo biaha na maart 2024, obteniendo su 42 partido internacional. El a perde e Campeonato Europeo despues na Alemania pa motibo di lesion.

Despues di e torneo, entrenador Ronald Koeman no a select'e como parti di un esfuerzo mas amplio pa refresca y reconstrui e team nacional.

Lesionnan di Jerdy Schouten y Joey Veerman, kende Koeman no ta considera mas como parti di su plan, a crea vacatura den mediocampo. Como reaccion, e entrenador tambe a yama Guus Til hunto cu De Roon.

E mediocampista di PSV di 28 aña tin seis aparicion internacional, cu su ultimo partido na october 2024. Ausencia di Xavi

Simons pa motibo di lesion a reduci aun mas opcionnan disponible pa Koeman den medio-campo ofensivo.

Stefan de Vrij lo perde Mundial despues di haya un lesion durante un partido di Serie A pa Internazionale diasabra. E defensor di 34 aña no a recupera na tempo pa uni na e seleccion.

De Vrij ta bira e di cuatro hungador cu ta keda afo di Mundial pa motibo di lesion. Mas prome a confirma caba cu Matthijs de Ligt, Jerdy Schouten y Xavi Simons tambe no ta disponible pa e torneo pa motibo di problema fisico.

Jeremie Frimpong a keda afo di seleccion despues di un temporada marca pa inconsistencia y lesionnan recurente.

Mats Wieffer a ser yama back den seleccion Hulandes despues di un aña afo di e team nacional. Su ultimo aparicion a bin den e victoria 8-0 di eliminatorio pa Mundial contra Malta aña pasa.

Crysencio Summerville a ser yama pa seleccion nacional pa prome biaha. E delantero di West Ham United tabata programa pa uni na e grupo durante e pausa internacional na maart, pero e mester a retira pa motibo di lesion.

Kees Smit di AZ y Luciano Valente di Feyenoord a entrena cu seleccion di Hulanda na Zeist

mas tempran e siman aki, pero ningun di nan, manera Jeremie Frimpong, a ser inclui den seleccion final.

"Mi a papia personalmente cu tur via FaceTime, y mi a papia cu Valente aki riba veld di entrenamiento. Mi a pensa cu tabata logico pa yama Frimpong. Asina mes, mi ta sinti cu na Hulanda nos ta pasa hopi tempo splicando decisionnan," Koeman a bisa tocante e omisionnan.

E manager di seleccion nacional tambe a papia tocante su speranza pa e torneo.

"Nos ta den dje pa gana, pero mi ta comprende realidad y loke otro nacionnan ta capaz di haci. Nada ta imposible, y esey ta nos meta. Mi ta kere cu nos por yega hopi leu."

Seleccion di Koeman ta inclui apenas dos hungador for di Ajax, Feyenoord y PSV. Esaki ta e cantidad mas abao den historia na un torneo internacional pa seleccion nacional. Opta a bisa cu tur seleccion anterior pa Mundial tabatin minimo seis hungador for di e tres club tradicional.

Ian Maatsen y Lutsharel Geertruida ainda ta den careda pa un lugar den Mundial despues cu nan a ser poni riba un lista di reserva, Koeman a confirma durante e conferencia di prensa diaranson.

Maatsen y Geertruida a ser

poni riba e lista di reserva pa motibo di incertidumbre continuo tocante condicion fisico di Timber.

"Mi a comprende cu a spera e lo bolbe entrena cu Arsenal awe," Koeman a bisa.

E seleccion completo ta asina:

Portero:
Bart Verbruggen
Mark Flekken
Robin Roefs

Defensor:
Virgil van Dijk
Jan Paul van Hecke
Jurrien Timber
Denzel Dumfries
Nathan Ake
Jorrel Hato
Micky van de Ven

Mediocampista:
Mats Wieffer
Guus Til
Frenkie de Jong
Tijjani Reijnders
Ryan Gravenberch
Justin Kluivert
Teun Koopmeiners
Marten de Roon
Quinten Timber

Delantero:
Memphis Depay
Wout Weghorst
Donyell Malen
Cody Gakpo
Crysencio Summerville
Brian Brobbey
Noa Lang

Potret di AFP.

Homber aresta pa hack dirigi riba aplicacion di Ajax y dato di fanaticonan

(NLTimes)—Un homber di 35 aña for di municipio di Buren a ser aresta dia-mars mainta como parti di un investigacion tocante supuesto actividadnan di hack contra AFC Ajax. Autoridadnan ta sospecha cu varios biaha el a drenta ilegalmente den sistema di computer di e club na comienso di 2026 sin autorisacion, BNR a reporta.

E violacion di seguridad a ser descubri na maart 2026 despues di un investigacion di RTL Nieuws. Segun e reportahe, e sospechoso hacker a informa periodista tocante debilidatnan den sistemanan digital di e club.

Door di fayó di seguridad den e app di Ajax, tabata posible pa haya acceso na dato priva di mas cu 300.000 fanatico



registra di Ajax.

Autoridadnan ta bisa cu e hacker a haya acceso na informacion conecta cu mas cu 42.000 ticket di temporada. E fayó di seguridad por a permiti cu e ticketnan ey ser reasigna digitalmente of desactiva completamente.

E violacion tambe a revela informacion tocante 538 persona cu prohibicion di drenta stadion. Investigadornan a bisa cu e vulnerabilidad den e sistema por a hasta ser usa pa kita e prohibicionnan sin autorisacion.

E sospechoso a presenta su

accionnan como divulgacion responsable despues di revela e vulnerabilidadnan den media, pero polis a bisa cu e no ta cumpli cu standard di un hacker etico.

Segun directivanan di Ministerio Publico, fayó di seguridad mester ser reporta inmediatamente y solamente na e organizacion envolvi. Investigadornan ta bisa cu e homber repetidamente a haya acceso ilegal na sistemanan, mientras Ajax solamente a bira consciente di e asunto despues di cobertura den media, obligando e club pa presenta un denuncia criminal.

Polis a confisca varios aparato di almacenamiento digital, manera computer y hard drive, durante un buskeda den cas di e sospechoso na Buren como parti di e inves-

tigacion continuo.

Despues di descubri e violacion, Ajax inmediatamente a notifica Autoridad Hulandes pa Proteccion di Dato tocante e incidente.

E club ta bisa cu e investigacion te awor ta muestra a haya acceso na solamente emailnan di varios centenares di persona, hunto cu nombernan y fecha di nacemento di un cantidad limita di personanan cu prohibicion di drenta stadion.

Investigadornan ta sigui examina si algun dato realmente a ser horta of comparti door di e sospechoso. Mientras tanto, Ajax a cera e buraco di seguridad y a fortalece su medidanan di ciberseguridad.

Noord-Brabant na alerta halto pa sapo Mericano invasivo

(NLTimes)—Noord-Brabant ta na alerta halto pa e sapo yama ‘American bullfrog’ despues cu un club di naturaleza a descubri un di e especie invasivo aki den un plas chikito zuid di Valkenswaard.

“E sapo ta un plaga pa henter e ecosistema nativo. Como provincia, nos mester protege nos ecosistema,” miembro di conseho provincial di Noord-Brabant Hagar Roijackers a bisa AD.

Manera mayoria especie invasivo, e sapo Mericano aki no tin enemigo natural na Hulanda. Na mesun momento, nan ta come hopi animal cu ta existi naturalmente.

“Nan ta come nos mesun saponan berde, salamandra y ta plama enfermedadnan y schimmel cu por afecta tur sorto di especie nativo,” Jeroen van Delft di agencia di reptil Ravon a bisa e periodico.

“Maximo, posiblemente un par di sapo so a crusa frontera awor, pero si no haci nada, otro aña lo tin mil,” Van Delft a bisa.

P’esey e enfoke awor ta riba stop e plamamento di e sapo Mericano trempnan.

E provincia ta trahando cu gobierno Belga riba investigacion di eDNA, haciendo test riba muestra di awa for di lagun, sloot, plasnan y otro

masa di awa pa señalnan di e sapo.

“Cu esaki, bo por detecta un larva den un masa di awa grandi manera un piscina Olimpico. Esey ta haci e buskeda un tiki mas facil.”

Si investigadornan topa rastronan di e sapo, nan ta scan e area pa posible plamamento y despues dicidi con pa responde.

“Door di gara e larvanan cu trampa of net, of door di tira saponan adulto cu bala di shotgun. Si ta safe pa haci esey, nos ta pomp awa for di un plas, y despues bo por gara e saponan facilmente,” Van Delft a bisa.



Ora a puntra nan dicon e provincia ta poniendo gran esfuerso contra e sapo Mericano mientras el a reduci su lucha contra e maribomba Asiatico aña pasa, Roijackers a bisa AD:

“Nos mester haci escogencianan y nos por solamente usa nos presupuesto pa especienan invasivo un biaha. E lucha contra e sapo ainda por ser gana, pero contra e maribomba no.”

YouTube ta bisa cu e lo marca contenido genera pa AI

(AFP)—YouTube lo automaticamente detecta contenido genera pa inteligencia artificial (AI) den futuro y marca e informacion pa bishitantenan di su plataforma, e compania di Google a bisa diaranson.

E movimiento ta anula un politica anterior di depende riba creadornan di video pa nan mes reporta si nan a usa hermentnan di AI generativo.

“Si un creador no especifica si el a usa AI of no, pero nos sistemanan detecta uso sig-

nificativo di AI fotorealistico, nos lo automaticamente pone un label riba dje,” YouTube a bisa den un blogpost.

E ultimo medida di e plataforma di video tocante AI generativo ta bin for di 2024, ora el a pidi creadornan pa marca contenido unda nan a usa e tecnologia.

Desde e tempo ey, tin avance grandi den produccion di imagen y video fotorealistico, cu modelonan di AI ampliamente disponible incluyendo Veo 3.1 di Google y Seedance di Bytedance, compania



mama di TikTok. Creadornan lo por desafiar e marcamento nobo si nan ta

pensa cu nan contenido a ser marca inhustamente como AI, YouTube a bisa.

E plataforma tambe a agrega cu e marcamento no lo tin ningun impacto riba su algoritmo pa recomenda video na usuarionan.

Otro plataforma y rednan social cu recientemente a introduci marcamento automatico di contenido di AI ta inclui servicio di musica Spotify.

Hopi espacio online ta yena cu imagen, video of audio genera pa AI, cual ta bira cada biaha mas dificil pa distingui for di creacion humano mientras e herment ta bira mas capable.

Nvidia lo aumenta gasto na Taiwan te \$150 biyon pa aña


(AFP) - Nvidia lo aumenta inversion na Taiwan te \$150 biyon pa aña, hefe di e gigante Mericano di chip a bisa diaranson, describiendo e isla impulsa pa exportacion como “epicentro di e revolucion di AI”.

Jensen Huang, director ejecutivo di e compania mas valioso di mundo, a bisa cu “Taiwan ta den auge” y cu inversion di Nvidia, cu ta subi for di \$100 biyon, lo “alimenta e ecosistema increibel aki”.

Taiwan ta un potencia den fabricacion di semiconductor usa pa train y alimenta sistemanan di inteligencia artificial.

E isla ta cas di gigante di produccion di hardware TSMC, cu ta transforma diseñonan di punta di Nvidia den componentenan di silicon, y Foxconn, cu ta arma e procesadornan pa traha servernan di centro di data.

“Cuatro aña pasa, cinco aña pasa, Nvidia tabata gasta mas o menos \$10, \$15 biyon pa



aña na Taiwan,” Huang a bisa na Taipei, unda e compania ta construyendo un oficina nobo.

“Awor, nos ta gastando \$100 bayendo pa \$150 biyon na Taiwan cada aña.”

Economia di Taiwan a subi fuertemente aña pasa danki na exportacionnan di hardware di AI cu a subi rapidamente, mientras gobierno y companianan rond mundo ta

inverti centenares di biyones di dollar den desaroyo di e tecnologia.

“Taiwan ta epicentro di e revolucion di AI,” Huang a bisa.

“Aki ta unda chipnan ta bini, packaging ta bini. Aki ta unda e sistemanan ta ser traha. Aki ta unda supercomputernan di AI a ser crea,” el a bisa. Huang a bisa cu Nvidia “lo sigui crece” na Taiwan, unda

su oficina nobo lo por acomoda “alrededor di 4.000 ingeniero”.

“Esaki lo ta e punto di fabricacion, tecnologia y fabricacion di electronica pa mundo pa hopi tempo binidero,” Huang a bisa.

“Y p’esey nos lo ta aki pa sostene, pa traha como partner cu nos ecosistema, pa haci co-ingenieria cu nos part-

nernan di ecosistema y pa sostene nan crecimiento. Y p’esey esaki lo ta un sitio hopi importante pa nos.”

Huang ta na Taipei prome cu e feria tecnologico mas importante di e isla, Computex, otro siman.

Su comentarionan a bin despues cu Nvidia a publica siman pasa ingreso trimestral record di \$81,6 biyon, superando fuertemente pronosticonan di Wall Street mientras demanda insaciabel pa su hardware di AI a impulsa un otro kwartaal extraordinario.

E resultadonan pa e prome kwartaal a marca un aumento di 85 porciento compara cu e mesun periodo un aña pasa y un aumento di 20 porciento compara cu e kwartaal anterior, subrayando status di Nvidia como principal beneficiario di e construccion global di infraestructura di AI.

Ganashi netto a subi fuertemente te \$58.3 biyon, mas cu triplica for di \$18.8 biyon den e periodo di un aña anterior.

Trahadornan di Samsung ta aproba acuerdo di bonus despues di ganashinan di AI

(AFP) - Miembronan di sindicato di Samsung Electronics a aproba diaranson un acuerdo cu gerencia pa sigura bonus anual masivo despues di menasa cu un welga grandi, mientras e popularidad global di inteligencia artificial ta causando cu ganashinan di e gigante di chip Sur Coreano subi fuertemente.

E acuerdo ta nifica cu alrededor di 78.000 empleado for di e forsa laboral domestico di e compania di 125.000 trahador ta elegibel pa ricibi un bonus di mas o menos \$370.000 e aña aki, basa riba un calculacion di mercado di ganashi operacional anual.

E sindicato mas grandi di Samsung a bisa den un declaracion cu mas cu 73 porciento di su miembronan a respalda e acuerdo den un votacion electronico teni durante seis dia.

E acuerdo a ser logra na ultimo momento siman pasa pa evita un welga di 18 dia cu a lanta miedo tocante impacto riba economia di Corea di Sur.



“E no ta exactamente na e nivel cu nos tabata kier... nos solamente mester acepta loke nos ta haya,” un trahador di chip di 23 aña a bisa AFP, pidiendo anonimidad.

E empleado a reconoce cu tabatin critica riba e pagonan grandi tanto for di paden di e compania como entre publico mas amplio, pero a bisa cu “hende ta solamente papia malo di nos sin sikiera purba compronde e situacion”.

Necesidad pa chipnan di memoria cu ta alimenta centro di dato di AI a impulsa e ganashinan di Samsung.

E firma a bisa na april cu ganashi operacional di prome kwartaal a subi mas o menos 750 porciento compara cu e aña anterior, mientras su balor di mercado a pasa \$1 triyon pa prome biaha e luna aki.

Bao di e acuerdo di 10 aña di sindicato — cu ta conecta na metanan ambicioso di rendimiento — bonus anual pa empleadonan den division di semiconductor lo suma 10,5 porciento di ganashi operacional di nan segmento.

E bonus lo ser paga den accion, hunto cu un 1.5 por-

ciento adicional den efectivo.

E plan di bonus a alimenta tension entre trahadornan den otro divisionnan — kende lo ricibi recompensa diferente bao di e acuerdo — manera tambe subsidiarionan y accionistanan.

E posibilidad di un welga a provoca preocupacion mas amplio na Corea di Sur, unda Samsung Electronics solamente ta conta pa alrededor di 12.5 porciento di producto interno bruto y chipnan di memoria ta representa mas o menos 35 porciento di exportacionnan. Tambe el a alimenta un debate tocante con ganashinan di AI mester ser reparti.

Un funcionario presidencial a lanta e idea di un “dividendo nacional” — argumentando cu entrada fiscal extra relaciona cu AI por ser usa pa sostene programanan di bienestar social.

Analistanan ta bisa cu bonus grandi por yuda preveni pa talento di ingenieria muda pa exterior, mientras companianan Mericano manera Tesla ta aumenta inversion den

chipnan di AI.

Segun sindicato di Samsung, trahadornan na fabricante rival di chip SK hynix — cu tambe a yega un capitalizacion di mercado di \$1 triyon diaranson — a ricibi bonus mas cu tres biaha mas grandi cu esnan paga pa Samsung aña pasa.

E ganashi inespera priminti na tur dos firma a eleva fuertemente e status social di ingenieronan di chip na Corea di Sur.

Un jacket simpel cu logo di SK hynix a bira viral riba rednan social e luna aki como simbolo di rikesa y exito, cu publicacionnan parodia cu ta mustr’e como un “golden ticket” pa miho oportunidadnan di cita romantico.

Agencia di noticia Yonhap a bisa cu trabaonan na Samsung y SK hynix awor ta garantiza “un impulso den balor riba mercado matrimonial”, citando un aumento den nan “indicanan di deseabilidad” compila pa agencia di matchmaking Sunoo — yegando cerca di profesionnan manera dokter y abogado.


Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Accidente cu hende herida na caminda principal dilanti Savaneta Kamp



Diamars atardi a drenta informe di un accidente cu hende herida dilanti Savaneta Kamp riba e caminda principal, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente unda un auto cu a bay subi caminda

grandi pero no a nota cu un motociclista ta bayendo pariba y a dal riba e brommer cu 2 persona riba dje lagando ambos herida.

Na yegada di e 2 ambulance nan a atende e victimanan y a transporta un pa Centro Medico y e otro pa hospital.

Accidente cu mucha herida pa falta di preferencia na De La Sallestraat

Diamars atardi a drenta informe di cu tin un accidente cu un mucha herida na e crusada Van Leeuwenhoekstraat cu De La Sallestraat, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente pa falta di preferencia un Pick-up Toyota Hilux biniendo for di Van Leeuwenhoekstraat a subi caminda sin a duna preferencia na e Honda CRV bayendo pabao den De La Sallestraat y nan a dal den otro un mucha pasahero den e pickup a resulta herida cu golpi na cabes.

Na yegada di e ambulance nan a atende e mucha victima.



Turista riba waverunner a bira malo riba lama y a cay den awa



Diamars atardi a drenta informe di cu un turista a bira malo y a cay den awa, mesora a dirigi tanto polis como ambulans na e sitio.

Na caminda pa e sitio a drenta informe cu nan ta treciendo e na canto y pa cuminsa cu C.P.R.. Na yegada di e patruya a bin compronde cu e homber tabata riba e waverunner y



diripiente a cay pero como cu e tabata tin su vest bisti e no a guli awa. Na yegada di e ambulance nan a inject'e cu medicamento y a sigui pa un rato largo cu CPR te ora a haya pulso y a bay cu urgencia cun'e pa hospital.

Un rato despues hospital a laga sa cu esnan na e sitio a haci un bon trabao.

Assistent di Matthew Perry deteni pa inyeccion di droga fatal



(AFP) - E asistent personal cu den varios ocasion a inyecta Matthew Perry cu ketamina prome cu el a fayece a keda sentencia na prison diaranson, birando e di 5 persona cu a enfrenta husticia pa e strea di "Friends" su sobredosis fatal.

Kenneth Iwamasa, di 61 aña, a ricibi orden pa cumpli 3 aña y 5 luna den detencion federal despues di declara su mes culpable pa conspiracion di distribui ketamina causando morto.

Fiscalnan a bisa cu den e dianan prome cu Perry su fayecimento den e dianan prome cu Perry su fayecimento, Iwamasa a duna e actor mas di 25 inyeccion di e droga, incluyendo por lo menos 3 e dia cu el a fayece.

Riba Perry su ultimo dia, el a bisa Iwamasa - ken tabata biba na su cas di luho na Los Angeles - "inyectam'i cu un grandi," documentonan di corte a bisa.

Perry su mama, Suzanne Morrison a bisa cu e famia tabata confia den Iwamasa.

"Kenny su trabao mas importante tabata di ta mi yiu su compañero y guardian den su lucha contr su adiccion," el a skirbi den un carta manda pa hues di distrito Sheryllyn Peace Garnett.

"Nos a confia un homber sin un consenshi, y mi yiu homber a paga e prijs."

Abogadonan di Iwamasa a bisa cu e tabata tiki mas cu un asistent, mara na e deshonnan di su hefe rico.

Iwamasa tabatin un vulnerabilidad particular den e "dinamica di e relacion den cual el a cay cu e victima. Den poco palabra, e simplemente no por a 'djis bisa no.' E falta di habilidad aki a trece con-

secuencianan tragico," e defensa a skirbi den documento di corte.

Iwamasa ta e di 5 persona cu a ser sentencia en conexion cu Perry su morto.

Otronan ta inclui dokter Salvador Plasencia, un di 2 dokter cu a genera ganashi for di Perry su adiccion.

E dokter a siña Iwamasa con pa inyecta ketamina, a pesar di sa cu e homber di 61 aña no tabatin training medico y no tabata sa nada tocante trata pashentnan cu substancianan controla.

Plasencia, ken na final tambe a haya un condena di 2 aña y mei, a traha cu otro dokter pa yega na e droga pa e actor, cobrando prijsnan sumamente infla y bisando "Mi ta curioso di sa con hopi e kens aki lo paga."

Su ayudante Erik Fleming, un consehero di medicamento certifica cu a actua como e conexion pa yuda provee e strea cu substancianan controla, a ricibi un sentencia di 2 aña den prison.

Y luna pasa Jasveen Sangha - un muhe Britanico-Mericanu yama e 'Reina di Ketamina' cu a promove su mes como un dealer pa streanan - a ricibi un sentencia di 15 aña.

Perry, di 54 aña, a lucha pa varios aña cu adiccion, pero pa su coleganan tabata ganando e bataya ora cu el a fayece. E actor tabata ricibiendo ketamina como parti di terapia supervisada pa depresion.

Sinembargo fiscalnan a bisa cu pa fin di 2023 el a bira adicto na e substancia, cual ta usa pa anestesia, pero tambe ta un droga popular pa festanan.

Ambulance a presenta pa un turista cu aparentemente un animal marino lo a pic'e



Diaranson mainta a drenta informe di cu un animal di lama lo a pica un turista di 63 aña di edad y el a bira malo.

Mesora a dirigi ambulance panort di Ritz Carlton.

Na yegada di e ambulans a resulta ta rasca ela rasca su pia

na un piedra nada mas.

Ambulance a atende na e sitio mes

Chauffeur di pick-up no a regula su velocidad ni a mantene distancia y a dal tras auto



Diaranson mainta a drenta informe di un accidente dilanti Cayena Mall, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda cu e chauffeur di e pick-up Nissan no a regula su velocidad ni a man-

tene distancia a bay dal tras di e Chevrolet.

Afortunadamente ningun hende a resulta herida.

Advertencia di seguridad despues cu 9 hende a muri durante ola di calor na Reino Uni

(AFP)—Royal Life Saving Society di Reino Uni a emití diaranson advertencianan tocante seguridad den awa despues cu nueve hende a muri den lama, riu y lagonan durante dianan di calor record den e pais.

Diamars e record pa dia mas cayente den mei a ser kibra na Inglatera y Gales, cu temperatura yegando 35,1 grado na Kew Gardens cerca di Londres.

Siete di e nueve mortonan relaciona cu awa reporta pa polis na Inglatera y Gales desde diadomingo a envolbe adolescente of muchanan jong.

RLSS a adverti cu na Reino Uni ora temperatura di aire yega 25 grado, “tin un riesgo cinco bi-

aha mas halto di morto accidental pa hogamento” y adolescente y adultonan hoben “ta proporcionalmente mas propenso pa perde nan bida.”

National Water Safety Forum a bisa diaranson cu “periodonan di calor hopi biaha ta coincide cu un aumento den morto accidental pa hogamento.”

Na Reino Uni, vianan di awa paden di e pais a representa mas cu mita di mortonan accidental pa hogamento desde 2019, pasobra e awa hopi biaha “ta keda peligrosamente friu henter aña,” e organisacion a bisa.

Diamars, un mucha homber di 17 aña a hoga den un lago na Cheshire y un mucha homber di 12 aña a muri despues di

haya dificultad den un riu na Lancashire, polis di e regionnan noordwest di Inglatera a bisa diaranson.

A encontra un curpa di un adolescente den un lago na Hampshire diaranson, zuid di Inglatera, media local a reporta.

E mortonan aki a bin despues di cuatro otro morto pa hogamento anteriormente reporta envolviendo adolescentenan na Inglatera desde diadomingo.

Na Lincolnshire noordoost di Inglatera, un mucha homber di 15 aña a hoga diadomingo, polis a bisa.

Tata di e mucha, identifica como Declan Sawyer, a emití un advertencia pa otro famia



tocante peligro di muchanan “hungando cerca di cualkier riu y lago den clima cayente.”

Un mucha muher adolescente a ser declara morto despues cu nan a sak’e for di awa na un parke acuatico na Warwickshire den centro di Inglatera dialuna, polis a bisa.

Na Yorkshire den noordoost, un mucha homber a hoga den un reservoir dialuna y a recupera curpa di un mucha homber

di 13 aña mainta trempa na un parke natural, polis a bisa.

Dos persona mayor tambe a muri den incidentenan relaciona cu awa durante e ola di calor: na Cornwall, un homber den su 60 añanan a muri dialuna di un paro cardiaco mientras e tabata purbando di yuda miembronan di famia den lama y un muher di 72 aña a ser saca for di lama na Gales diadomingo y a muri na e sitio, segun polis local.

Resultado Sorteo 27 mei 2026				
Cadena Alexander Lottery ta presenta resultado di weganan di suerte				
DIARIO		KORSOU	SUPER4	FLAMINGO
4065	3744	2117	8902	
2383	9475	SUPER5	5732	
6087	9164	-	2310	

MERDIA		ANOCHI	
			
Sorteo # 4986		Sorteo # 2700	
1092		0 x Jackpot	
8543		0 x Match 4+	
1719		5 x Match 4	
		182 x Afl. 12,00	
X2			
			
Sorteo # 4986		Sorteo # 7192	
4860		0 x Jackpot	
		12 x Match 4	
X3		193 x Afl 8,00	
			
Sorteo # 3042			
1790			
			
Sorteo # 4986			
0166			
Acuario			
			
Sorteo # 1860			
144			
			
X5			

			
Sorteo # 8857		Sorteo # 2700	
3445		0 x Jackpot	
1064		0 x Match 4+	
1211		5 x Match 4	
		182 x Afl. 12,00	
X2			
			
Sorteo # 7901		Sorteo # 7192	
6937		0 x Jackpot	
		12 x Match 4	
FP		193 x Afl 8,00	
			
Sorteo # 2606			
2156			
			
Sorteo # 6660			
6942			
Tauro			
			
Sorteo # 1590			
346			
			
FP			

		01-11-12-18-28	
Sorteo # 2700		Joker 16 Letter D	
0 x Jackpot		Proximo Jackpot	
0 x Match 4+		380.000,-	
5 x Match 4			
182 x Afl. 12,00			
		04-05-06-08-21	
Sorteo # 7192		Proximo Jackpot	
0 x Jackpot		52.000,-	
12 x Match 4			
193 x Afl 8,00			
			
Sorteo #		Mega Ball	
0 x Jackpot		Proximo Jackpot	
0 x match 4		280.000,-	
0 x Afl. 500,00			
0 x Afl 50,00			
0 x Afl.15,00			
		Afl 380.000,-	
			
Sorteo #		Sorteo #	
			

DEZHI a muda pa un localidad nobo na Wilhelminastraat 7 – Cas Veneranda



Departamento di Asunto Economico, Comercio y Industria (DEZHI/DEACI) ta informa tur ciudadano, empresario y interesado cu e departamento a muda oficialmente pa un oficina nobo, localisa na Wilhelminastraat 7, Cas Veneranda.

Cu e mudanza aki, DEZHI ta sigui traha pa brinda un servicio accesibel y eficiente na

comunidad y sector empresarial di Aruba.

E Helpdesk di ‘Permiso pa Negoshi’, situa na planta abou, ta habri pa publico mainta di 8:00 AM – 11:30 AM y atardi di 1:30 PM – 4:00 PM.

Pa mas informacion relaciona cu permiso di negoshi por tuma contacto cu DEZHI na 521-2400 of por bishita nos website.



Cas Di Cultura
Vondellaan 2
Tel: 582-1010

F A D A
Campanastraat 5
Tel: 583-2999
Tel: 583-9610

F A V I
Primavera 233
Tel: 582-5051
Tel: 582-5222

F E P O
Engelandstraat 15
Tel: 583-1016
Tel: 583-6607

**Fundacion Contra
Violencia Relacional**
Tel: 583-5400

**Fundacion Autismo
Aruba**
Irenestraat 21 Aruba
Tel: 588-1179

**Fundacion Pa Nos
Muchanan**
Cumana 2
Tel: 583-4247

**Fundacion Tel Pa
Hubentud**
Wilhelminastraat 19
Tel: 588-6138

**Koningin Wilhelmina
Fonds**
Spinozastraat 9
Tel: 582-0412

Mary Joan Foundation
Sabana Blanco 8
Tel: 588-9999

Rode Kruis Aruba
Pedro Gallegostraat 14
Tel: 582-2219
Fax: 588-3376

Famia Planea (SBVO)
Ave. Milio J Croes 17 B
Tel: 588-9591
www.famiaplanea.org
famiaplanea@hotmail.com

Fundacion Guia Mi
George Madurostraat 34
Tel: 582-0088

Y M C A
Calbasstraat 1
Tel: 582-3072

AL-ANON group
Sabana Liber #8, Noord
(close to the hotels)
Tel: 736-2952 or
593-7081



Dokter na warda

Oranjestad Hospital 7:00 pm / 10:00 pm	San Nicolas Imsan 24 ora
---	---------------------------------------

Botica na warda

Oranjestad:	Oduber Tel. 582 1780
San Nicolas:	Aloe Tel. 584 4606

Emergencia

Polis Oranjestad	100
Polis San Nicolas	104
Polis Santa Cruz	105
Polis Noord	107
Tip Line	11141
Brandweer	115
Ambulans	911
Hospital	527-4000
Imsan	524-8833
Warda Costa	913
Seguridad Nacional	11911
Cruz Cora	582-2219

Botica

Aloe	584-4606
4 Centro Medico	584-5794
Central	585-1965
Dakota	588-7364
Del Pueblo	582-1253
Eagle	587-9011
Kibrahacha	583-4908
Maria	585-8145
Di Servicio Noord	586-4606
Oduber	582-1780
Paradera	588-6638
San Lucas	584-5119
Santa Anna	586-8181
Santa Cruz	585-8028
Sero Preto	584-4833
Trupial	583-8560

Utilidad

Setar	117
Web	525-4600
Elmar	523-7147

Funeraria

Aurora	588-6699
Royal Funeral H.	586-4444
Ad Patres	584-2299
Olive Tree	584-8888

TAXI

**Aruba Transfer Tour &
Taxi C. A.**
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

Misa ta lansa comision di berdad pa asesinatonan den guerra di droga na Filipinas

(AFP) - Misa Catolico Filipino y gruponan di sociedad civil a lansa diaranson un comision di fact-finding pa crea loke nan ta bisa lo ta un “record publico creible” di ex presidente Rodrigo Duterte su guerra mortal.

E iniciativa a lansa oranan prome cu Corte Criminal Internacional (ICC) a anuncia un comienso na e huicio di Duterte dia 30 di november, ken a aresta aña pasa y a entrega na e tribunal pa supuesto crimennan contra humanidad.

Encabesa pa un ex hues di ICC y cu sosten di e misa Catolico, Philippine Truth and Reconciliation Commission tin meta di “establece un record publico creible di asesinatonan extrajudicial y abusonan relaciona conecta na gobierno su guerra contra droga,” el a bisa den un declaracion.

E cuerpo di 5 miembro ta anticipa di cuminsa audiencianan publico den fin di juli, cu un enfoko riba “documenta testimonio di sobrevivientenan, recomienda medidanan di responsabilidad y identifica reformanan institucional pa preveni violencia



den futuro,” el a agrega.

“Nos meta ta pa tende e victimanan conta nan storia. Nos meta ta di establece e berdad,” presidente Raul Pangalangan a conta na un conferencia di prensa. PA e experiencianan por bay den historia, “e victimanan mester tin un parti activo” den e buskeda pa husticia, otro hues di ICC a agrega.

Gruponan di derecho ta bisa cu te hasta 30.000 persona a keda asesina den e operacion durante Duterte su presidencia, varios di nan dealer di

droga di nivel abao ademas di su usarionan.

Polis di Filipinas a reconoce cu a tira mas di 6.000 sospechoso den defensa propio.

Algun oficial a keda persigui na cortenan di Filipinas pa motibo di e asesinatonan, cual a inclui muchanan y menornan.

Duterte ta enfrenta 3 cargo di crimen contra humanidad, cu fiscalnan di ICC acusando cu el a hunga un rol den por lo menos 76 asesinato entre 2013 pa 2018.

Pronostico di tempo

Tempo:

Awe tardi y awe nochi: levemente te parcialmente nubia y generalmente seco
Den marduga y mañan: parcialmente nubia cu un awasero pasahero.

Temperatura maximo 33 grado Celsius

Temperatura minimo 27 grado Celsius

Indice di calor (heat index) den y rond di oranan di merdia: 34 pa 38 grado Celsius
Uv index: 12

Bahada di solo : 7:01 pm
Subida di solo : 6:13 am

Biento:

Moderate te basta fuerte for di direccion oost; forsa 4 te 5 (20 te 39 km/ora, 11 te 21 nudo).
Den dia fuerte te duro, posiblemente hopi duro den rafaga; forsa 6 te 8 (40 te 64 km/ora, 22 te 35 nudo)

Situacion general di tempo:

Diferencianan di presion den region lo keda grandi y esaki lo produci un biento fuerte te duro y hopi duro den rafaga. E atmosfera relativamente seco lo limita desaroyo di nubianan cu por produci yobida. No ta spera awasero di importancia durante e periodo di pronostico aki.

Concentracionnan varia di stof di Sahara lo stroba visibilidad y trece aire di menos calidad den region local durante proximo dianan. Personanan cu tini sensibilidad pa cambionan den e calidad di aire mester tene esaki na cuenta.

Condiccionnan maritimo/ estado di lama:

Na partinan protegi di costa: keto cu olanan rond di 1 pia.
Na partinan zuid protegi: tranquil, 1 te 2 pia.
Na partinan zuid no protegi: modera cu olanan alrededor di 2 pia te 4 pia.

Na partinan oost te noord-



west di costa: modera te localmente poco bruto cu olanan alrededor di 5 pa 8 pia, localmente e por yega 9 pia.

Aviso/ alerta:

Ta sugeri operadornan di boto chikito pa bay cu extremo cautela riba lama habri. E biento fuerte te duro lo crea condicionnan di lama bastante bruto te bruto.

Un aviso pa boto chikito pa partinan oost te noordwest di costa ta sigui na vigor. Usuarionan di lama y landadonan na e partinan expone (no protegi) di costa zuid tambe mester bay cu ca

OLIVE TREE
FUNERAL CARE & CREMATORY

*Lagrima y flornan por seca, su
recuerdonan y tur loke el a haci
y significa pa nos, lo keda graba
pa semper den nos mente y
curason.*

*“Cerca Dios mi alma ta na paz,
ta di DJE mi salvacion ta bin”
Salmo 62:1*

**Iris Guillermina
Larmonie Cijntje**

***30-07-1931-†22-05-2026**

Su casa: James Larmonie

Yiunan:

Marelva Larmonie †
Arlene Martis-Larmonie y Hubert Martis
James Jr “Jimmie” Larmonie y Marion
Wendell Larmonie
Leslie Larmonie

Rumannan:

Yolando Cijntje y yiunan
Dennis Cijntje y yiunan
Cesar Cijntje† y yiunan
Jossy Cijntje† y yiunan
Frida Garcia† y yiunan
Gibi Cijntje† y yiunan

Nieto/anan:

Aldwin Larmonie
Mariendell Larmonie
Andrew Larmonie
Andreïna Martis
Adriënne Martis
Xie- Marie Larmonie
Marson Rafini
Sean Larmonie

Bisanietonan:

Aleena Larmonie
Matteo y Lucca Martis

Ta invita pa asisti na e acto di despedida cu ta tuma lugar
diabierna 29 mei 2026 di 9:00 am pa 11:00 am na misa Pro
Cathedral San Francisco na Playa.

Nos kier pidi disculpa si nos a lubida un of otro famia den nos
tristesza.

Despues di acto di despedida no lo ricibi bishita di condolencia
na cas



Aurora
Royal Pray
Funeral Home & Crematory

*“Señor ta mi wardador, mi’n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa”.*
Salmo: 23

Nos ta anuncia fayecimento di

Juan Jacinto Tromp
***03-09-1932 - †22-05-2026**

Esposa: † Julieta Tromp

Yiunan:

Beatriz y Thomas Wolff
Florentina y Nestor Franken
† Leo Tromp
Gloria y Crispo Maduro
Luciano Tromp
Rebecca y João da Silva

Nieto(a)nan:

Oscar y Anurdey Wolff
Anthony y Maria Fernanda Wolff
Anushka Wolff y Juan Paula Prado
Milton Franken
Shamila Franken
Veronica Tromp y famia
Jose y Shyre da Silva
Jo-Anne da Silva y Rugerie de Mey
Juan da Silva y Joanaila Palm

Bisanieto(a)nan:

Andru Wolff y Alexandra Hernandez
Jeandro Wolff
Claricel Wolff
Isabella Mier y Teran
Joshwin da Silva
Jilainy da Silva
Jay-Xion da Silva
Ruëlla de Mey
Josey-Anne da Silva
Jay-xien da Silva
Zivion de Mey



Tataranieto: Arziel Wolff, Claryanne Wolff

Rumannan:

† Asencion y † Orelío Quandus y famia
† Pablo Tromp y † Theresita Tromp y famia
† Anna y † Francisco Ridderstaat y famia
† Catharina y † Theodor Farro y famia
† Thomasa y † Francisco Quandus y famia
† Clara y † Otilio Tromp y famia
† Fermina Tromp y famia

Sobrino y sobrinanan, primo y primanan,
comer y compernan, amigo y amiganan y
compañeronan y trahadornan di St. Michael
Paviljoen SABA.

Famia: Tromp, Wolff, Franken, Maduro, da
Silva, de Mey, Webb, Palm, Pineda, Mier y Teran,
Paula Prado, Serrano, Quandus, Ridderstaat,
Farro, Ramirez, Figaroa, Lacle, Gobin, Lopez,
Irausquin, Boekhoudt, Mejia, Werleman,
Geerman, Kelly, Orman, Chahin, Jacobs,
Gavidia, Jansen, Richardson, Gomez, Van der
Biest, La Rosa, Wever, Giel, Semeleer, Eckmeyer,
Conquet, Wagemans, Solognier, Dijkhof, Croes,
Hoek, Marti, Esser, Pak.

Despensa nos si den nos tristeza nos por a lubida
un of otro persona of familiar.

Ta invita pa e acto di entierro cu lo tuma lugar
diahuebs 28 di mei 2026 na Aurora Funeral
Home di 2:00 pa 4:00 pm, despues lo sali pa
santana catolico na Noord.

Durante periodo di luto y despues di entierro no
lo ricibi bishita di condolencia na cas.

In Memoriam

Met grote droefheid en respect nemen wij afscheid van



Raymond (Juni) de Kort

Juridische ondersteuning van 20 december 1983 tot 23 juli 2015

Zijn warme persoonlijkheid en wijsheid zullen erg gemist
worden door collega's, vrienden en iedereen die met hem
heeft samengewerkt.

Onze gedachten gaan uit naar zijn familie, vrienden en
dierbaren.

Wij hopen dat zij troost vinden in de mooie herinneringen
aan Juni en alles wat hij heeft betekend.

“Dankbaar voor alles wat je hebt betekend. Rust in vrede.”

Gemeenschappelijk
Hof van Justitie

Aurora
Royal Pray
Funeral Home & Crematory

*“Bou di alanan di Dios mi ta
sigur”*

*Abo ku ta biba bou di amparo di
Altisimo, ta hospedá den sombra
di Dios Omnipotente, bisa Señor:
“Mi refugio, mi forti, mi Dios,
den kende mi ta
pone mi konfiansa”*

Salmo 91:1-2



Cu dolor na nos curason,
nos ta participa fayecimento
di:

**Edgar Giovanni
Koolman**

Mihor conoci como “Jojo”
***06-11-1972 - †26-05-2026**

Acto di entierro lo wordo
anuncia despues

Aurora

Royal Pray

Funeral Home & Crematory

Salmo 23
Senor ta mi wardador, mi'n tin falta di nada.
Den cunucu di yerba berde e ta pone mi sosega.
E ta hiba mi na awa trankil, pa mi bolbe haya forsa”.

Cu dolor na nos curason, pero conforme cu Dios su boluntad, nos ta anuncia fayecimento di nos Mama stima:



Sra. Eligia Rufina Willems
Cariñosamente yama: “Ligia”
★20-05-1960 - †20-05-2026

Mayornan: † Luis B. Willems y † Rosa Kock

Pareha di bida: Elias de Freitas

Tata di su yiunan: † Johnny Krosendijk

Na nomber di su yiunan:
Johnny G. Krosendijk y pareha Janine J. Maduro.
Jelitza D. Krosendijk y Esposo Eldon M. Croes
Angelique S. Krosendijk y pareha Elvis James

Mescos cu un yiu: † Kevin Dania

Mama y tata di su nieto y nietanan:
Eldrith Jessica Wever
Lucien Alexander De Cuba

Nieto y nietanan:
Julienne E. Krosendijk,
Johndrick G. Krosendijk,
Naichell E. Croes
Jeydon P. Croes
Cristian A. de Cuba
Cristopher A. Ambrosio de Cuba.

Rumannan:
Silvio E. Willems
† Edwin P. Willems
Rubert A. Willems
Roni J. Willems
† Herman P. Willems
Roslyn E. y Marcelino Valdez
Roly Croes y † Filomena Wernet.
Luisa y Willy Hasham.

Subrino y subrinanan:
Gregory Willems, Christiaan Willems, Angelo Willems,
Angelique Willems, Maureen Valdez, Gilbert Valdez,
Ernelly Valdez, Rodrig Willems, Emelly Willems, Jeanis Willems, Dwyer Hasham, Ghislaine de Majjer Hasham.

Tanta y omonan:
Sr. Juaquin y Mena Vrolijk y Famia, Sra Vda Cecilia Willems y Famia, Sra. Vda Margo Todman y Famia.

Primo, prima, swa y cuñanan

Demas Famia: Willems, Kock, Krosendijk, Valdez, Wernet, Croes, Henriquez, Hasham, Majjer, James, Maduro, Solognier, Pieterse, Figaroa, de Cuba, Gumbs, v/d Biezen, Curiel, Geerman, Jacapuchi, Pieternella, Todman, Tromp, de Freitas, Wild, Vonk, Thijsen, Boekhoudt, Thiel, Giel, Vrolijk, Trimon, Eckmeyer, v/d Linden, Kelly, Illidge, Salazar Betancourt, Wever.

Coleganan y Amistad di:
Ballast Nedam, New Age, Angelo Fashion World, The Stars Hair Studio, Dufry Aeropuerto y Dufry Oranjestad, Avolta Aruba, Eljena Cleaning, Courtyard by Marriott.

Ta invita tur famia amistad y conosirnan:
Anochi di Condolencia lo tuma lugar na Aurora Funeral Home Diabierna 29 di Mei di 7or pa 9 or di anochi.

Acto di entierro lo tuma lugar diasabra 30 di Mei 2026 na Misa Santa Famia Pos chiquito di 2or pa 4or di atardi y despues lo Sali pa Santana di Sabana Barosa.

Despensa nos si den nos tristeza por a lubida un of otro famia of conocir. Despues di entierro famia ta prefera di no ricibi bishita na cas, danki pa compronde.

Aurora

Royal Pray

Funeral Home & Crematory

Mi no a muri, ta pesey mi no a bisa ayo. Mi a djies habri mi halanan y bula bai keiro. Boso cu a keda atras, no laga tristesa domina boso.
Keda uni un cu otro pa mi alma sosega. Esey lo ta un alegria pami pa recordami cu hopi amor.



Cu dolor na nos curason pero conforme cu boluntad di Dios nos ta anuncia fayecimento di nos ser keri:

Iris Martha Offerman Trinidad
★20-10-1956 - †25-05-2026

Na nomber di:
su mayornan:
† Francisca Carmen Trinidad Mercera
† Cleto Celestino Trinidad

Su casa : Andres Justino Offerman

Su yiunan :
Andro Offerman y Kimberly Peña
Chendro Offerman y Jacqueline Malmberg
Danielo Offerman y famia

Su hijastronan:
Ernesto Domacase y famia
Nelson Offerman y famia
Arold Offerman y famia
† Kenneth Offerman y famia
† Eugene Offerman y famia
Glenn Offerman y famia
Andre Offerman y famia

Su yiunan di criansa :
Elca Mercera
Cyrianta Trinidad
Sharin Offerman

Su nieta y nietonan :
Giandro, Jaedro, Lizienne
Zjéandro, Zikion

Manera su nieta/nieto nan:
Shaina Offerman y casa Huub Groot
Thayshamira y Mathew Groot
Joyslyn
Aishlyn
Joshmar

Su rumannan :
Arthur Mercera y Famia
† Glenda Mercera y Famia
Marelda Thode Trinidad y famia
Joyceline Trinidad y famia
Inolda Jansen Trinidad y famia
Calvin Trinidad y Famia

Su subrina y subrinonan, Su tanta y tionan, Su prima y primonan, Su madrina y padrinonan, Su lhanan, Su comader y compadernan, Su cuña y swanan

Su amiganan sercano na Aruba: Silvia Dirks y famia, Bea Markes y famia, Sonia Brunk y famia, Runoldina Bijlhout y famia, Maria Wolff y famia, Ariani Werleman Peña

Su consuegro: Wilfred Malmberg
Tur demas amiga, amigo y conocirnan na Aruba, Bonaire & Curaçao.

Demas famia: Offerman, Trinidad, Mercera, Jansen, Trenidad, Beaumont, Morillo, Peña, Malmberg, Cicilia, Pourier, Kocks, Winklaar, Bernabela, Amstrong, Goeloe, Albertus, Antony, Nicolaas, Ilario, Sint Jago, St. Jago, Reina, Martijn, Obispo, Wijman, Frans, Balentien, Cathlin.

Nos disculpa si den nos tristesa nos por a lubida un famia of amistad.

Oportunidad pa tuma despedida lo ta Diasabra, 30 Mei 2026 di 2or pa 4or na Aurora Funeral Home.
Pa cumpli cu desco di nos ser keri, ta pidi pa bisti colornan alegre.

Entierro di nos ser keri lo tuma lugar na Bonaire.

Aurora

Royal Pray

Funeral Home & Crematory

Nos ta anuncia fayecimento di:



Jozef Errol Statius
Mihor conoci como: Roy of Bashaka
27 August 1952 – ★6 May 2026

Mayor nan:
★Marcelino (Pablo) Statius
★Timotea (Veneranda) Statius – Krozendijk

Ruman nan:
Roque (Buchi) Statius
Swinda Angela-Statius y famia
Martica (Tica) Rasmijn-Statius y famia
Amancio (Donny) Statius
★Vencia Statius
★Gloria Statius
★Filomena Maduro-Statius y famia
★Vera Maduro-Statius y famia
★Sheila Maduro-Statius y famia

Subrino/a nan:
Jacqueline, Jannelys, Randy, Johnny, Enzo, Roger, Sandro, Jeffrey, Quillion, Bert, Shahir, Ryan, Marlon, Mireya, Ralf, Cinthia, Obet & Jeune

Tanta nan y Omo na bida:
Hilda Falcon (Tia Hilda) y famia
Marcelina (Tanta Lin) Krozendijk y famia
Hendrik Krozendijk (Mo Diek) y famia

Demas famia y conocirnan: Statius, Rasmijn, Stamper, Maduro, Krozendijk, Angela, Falcon, Kelkboom, Solognier, Geerman, Wernet, Engelen, Vrolijk, Thiel, Sintjago, Willems, Rib, Farro.

Ta invita demas famia, bisia, amigo y conocir nan pa e **acto di entierro** cu lo tuma lugar ariba diahuebs dia 28 di May 2026 na Aurora Funeral Home & Crematory for di 9:00 a.m. – 11:00 a.m. y despues lo por compania nos na su ultimo lugar di descanso na Santana Sabana Basora.

Nos disculpa cu si den nos tristesa nos por a lubida un of otro famia of conocir.

Nos ta lamenta cu awor y despues di entierro nos no lo ricibi bishita di condolencia na cas.

Aurora

Royal Pray

Funeral Home & Crematory

Viviste para los tuyos sin guardar nada para ti



Hoy no hay despedida en tu partida, por que sigues viva en cada uno de nosotros, en nuestras voces, en nuestros abrazos, en el ejemplo que nos dejaste.
Descansa en paz.
Tu familia te lleva en el corazon para siempre

Alcira Andrade Vargas
“Lupe”
★16-03-1951 - †18-05-2026

Acto di entierro lo wordo anuncia despues

Fondo oficial pa Gaza di Trump su Directiva di Paz ta bashi

(AFP)— Directiva di Paz di presidente Mericano Donald Trump no tin placa den su fondo oficial pa reconstruccion di Gaza, un fuente familiar cu e directiva a bisa AFP diaranson, a pesar cu paisnan miembro a compromete biyones di dollar.

Trump originalmente a concebi e directiva pa reconstruccion di Gaza, unda Israel y Hamas a acorda riba un paro den combate cu apoyo di Merca na october den un intento pa stop dos aña di guerra devastador.

Pero rapidamente el a causa sorpresa door di manda invitacionnan amplio, incluyendo na presidente Ruso Vladimir Putin y na paisnan cu ta hopi leu di diplomacia tradicional di Medio Oriente.

Desde cu a estableci e direc-



tiva, su fondo — administra pa Banco Mundial y aproba pa Nacionnan Uni — no a ricibi ningun placa di donantenan, e fuente familiar cu Directiva di Paz a bisa AFP.

E fuente a bisa cu no a deposita e placa pasobra e fondo tabata diseña pa fase di reconstruccion y desaroyo, cual ainda no a alcanza.

Operacionnan militar Israeli na Gaza a continua a pesar di e acuerdo pa stop combate, cu

minimo 910 persona morto desde e tempo ey, segun ministerio di salud di e teritorio.

Israel ainda ta retene control riba 60 por ciento di Franha di Gaza, incluyendo tur punto di entrada y salida, mientras e poblacion ta concentra riba costa.

Diaranson mas tempran, Financiamiento Times a reporta cu e directiva a ricibi donacion directamente den un cuenta di JPMorgan, citando vocero di e directiva.

No tin “requisito independiente di transparencia” implementa pa e cuenta di JPMorgan, FT a nota.

Den un publicacion riba red social, Directiva di Paz a bisa cu e fondo administra pa Banco Mundial tabata “solamente un di hopi mecanismo di financiamiento cu te awor no a ser utiliza pa e comunidad di donante.”

E publicacion a agrega cu e directiva a ser financia “door di otro mecanismonan.”

Paisnan Europeo principal a evita e directiva, cual ta carga cu partnernan historico di Merca den Medio Oriente, aliadonan ideologico di Trump y paisnan chikito cu ta busca atencion di Trump.

Francia y Reino Uni a nenga pa uni.

E directiva ta claramente lidera no solamente pa Merca pero personalmente pa Trump, kende tin e ultimo palabra y por keda na mando despues di su presidencia.

Trump a bisa anteriormente cu Merca lo contribui \$10 biyon na e directiva, mientras Qatar, Arabia Saudita y Emiratonan Arabe Uni cada un a priminti un minimo \$1 biyon.

Miembronan di e directiva mester paga \$1 biyon pa un lugar permanente, segun su carta.

Un evaluacion EU-UN publica na april a calcula cu mas cu \$71 biyon lo ta necesario den e siguiente decada pa reconstrui un Gaza destrui pa guerra, unda UN ta bisa cu e situacion humanitario ta “critico.”

Gobernador Mexicano ta keha di “persecucion” den caso di morto di dos agente Mericano

(AFP)—Gobernador di Chihuahua na Mexico a bisa diaranson cu nan ta “persiguiendo” e via partido gobernante di e pais pa motibo di e caso di dos oficial Mericano cu a muri na april durante un redada anti-droga sin autorisacion den su estado.

Maria Eugenia Campos, di partido oposicion Partido Acción Nacional (PAN), a presenta pa

interogacion na oficina di Fiscal General di Mexico den Ciudad di Mexico tocante e incidente di 19 di april.

Pafo di e edificio, Campos a bisa cu nan ta “persiguiendo mi cu henter peso di e aparato di Estado” mientras politiconan di partido gobernante Morena tin “impunidad absoluto.”

Den e incidente di april, dos oficial Mericano — cual a re-

porta ta agentenan di CIA — a muri den un accidente di auto mientras nan tabata acompaña soldad y fiscalnan estatal den un redada riba un laboratorio di droga na Chihuahua.

Presidente Claudia Sheinbaum a duna orden pa conduci un investigacion tocante e operacion, bisando cu posiblemente el a viola leyman di seguridad nacional cu ta prohibi agente stranhero sin autorisacion di



opera den Mexico.

Operacionnan anti-droga ta responsabilidad exclusivo di gobierno federal, Sheinbaum a bisa, notando cu e agentenan di CIA no a anuncia nan actividad

conforme cu acuerdonan di seguridad entre Merca y Mexico.

Fin di april, Departamento di Husticia di Merca a solicita e aresto y extradicion di 10 politico di partido gobernante, in-

Suecia ta rechasa propuestanan pa elimina uso di combustible fosil

(AFP)—Gobierno di Suecia a rechasa diaranson recomendacionnan di un comision nombra pa gobierno to-

cante manera pa elimina uso di combustible fosil, cual a inclui aumento di belasting riba gasolin y diesel pa logra

e metanan climatico di e pais pa 2030.

Coalicion derechista di prome minister Ulf Kristersson, cu apoyo di e partido ultra-derechista Sweden Democrats, a encarga e rapport experto na 2024 pa busca solucion pa reduci uso di combustible fosil, specialmente den sector di transporte pa caminda.

Suecia a establece un meta pa reduci emision di CO2 for di transporte cu 70 por ciento pa 2030 compara cu nivelnan di 2010, y pa logra emision neto cero pa 2045.

E comision a propone diaranson un aumento den e porcentahe obligatorio di bio-combustible of alternativanan cu menos carbon cu proveedor di gasolin mester mescla den nan productonan.

E nivel actual “ta demasiado abao pa Suecia por logra su compromiso di 2030 sin e sistema comercial ESR” di

cumpra cuota den exterior, e rapport a bisa.

E tambe a propone un aumento di belasting riba gasolin y diesel pa motiva consumidornan cambia pa vehiculonan electrico.

E propuestanan ta bay en contra di e politicanan cu gobierno a promove desde cu a asumi poder na 2022, esta reduciendo belasting riba gasolin y reduciendo e obligacion di bio-combustible.

E rapport ta bin mientras Suecia ta apenas algun luna for di eleccion general riba 13 di september.

“E comision aki a ser estableci dos aña pasa, prome cu (presidente Mericano Donald) Trump (a cuminsa su di dos termino) y prome cu e guerra na Iran,” minister di Finanzas Elisabeth Svantesson a bisa emisora publico SVT.

“Den e situacion aki, prijs di

gasolin ta asina haltu cu e ta haci bida di hende mas dificil. Lo ta un mal idea” pa subi prijs aun mas, el a bisa.

Gobierno recientemente a baha belasting riba gasolin temporalmente como respuesta na e crisis di energia.

E comision tambe a propone aumenta subsidio pa auto electrico y reduci belasting riba electricidad pa famianan.

Varios rapport experto a conclui den e ultimo añanan cu Suecia probablemente no lo por logra su metanan climatico pa 2030 y 2040 pa motibo di politicanan di gobierno.

“Eliminacion gradual di combustible fosil mester ser ehecuta den un manera sigur y aceptable, pa mantene y fortalece competitividad di Suecia y su companianan,” ministerio di Clima a bisa den un declaracion diaranson.

Aurora
Royal Pray
Funeral Home & Crematory

“Señor ta mi wardador, mi’n tin falta di nada.
Den cunucu di yerba berde e ta ponemi sos-ega.
E ta hibami na awa trankil,
pa mi bolbe haña forsa”.

Salmo: 23

Cu dolor na nos curason, nos ta participa fayecimento di:

Bernardo Alfonso Croes
Mihor conoci como “Benny”
*20-08-1944 - †26-05-2026

Acto di entierro lo wordo anuncia despues

Israel ta mata hefe di brasa arma di Hamas den atake na Gaza

(Infobae) - Israel a bisa diaranson cu el a mata e hefe nobo di brasa arma di Hamas na Gaza, Mohammed Odeh, despues di mata su predecesor anteriormente e luna aki a pesar di un acuerdo pa stop combate cu ta vigente.

Desde e atake di Hamas na october 2023, Israel a enfoca sistematicamente riba lidernan di e grupo, tanto na Gaza como den henter region.

Odeh ta e di cuatro hefe di Brigadanan Ezzedine Al-Qassam cu Israel ta afirma di a mata desde cuminsamento di e guerra na Gaza.

Den un declaracion conhunto, ehercito Israeli y agencia di seguridad domestico Shin Bet a confirma morto di Odeh riba diamars, bisando cu el a ser nombra hefe di e brigadanan despues di asesinato di Ezzedine al-Haddad riba 15 di mei.

Minister di Defensa Israeli Israel Katz a bisa cu e “comandante di brasa arma di organisacion terrorista Hamas na Gaza a ser elimina ayera y manda pa topa cu su socionan den profundidad di infierno”.

Contacta pa AFP, un fuente



di Hamas a bisa cu esposa di Odeh y dos di su yiunan tambe a muri den e atake aereo, y cu entiero lo tuma luga diaranson na Ciudad di Gaza.

E grupo nunca oficialmente a anuncia of confirma Odeh como hefe di e brigadanan, pero e tabata hefe di su servicio di inteligencia durante hopi tempo y tabata un di e figuranan di alto nivel mas importante cu ainda tabata bibo na Gaza.

Diamars anochi, un fuente di seguridad na Gaza a conta AFP cu tabatin bombardeo Israeli intenso den parti west di Ciudad di Gaza.

E fuente a bisa cu e no tabatin “ningun informacion riba e blanco”, pero cu e “es-

cala y intensidad di e atake a alimenta especulacion cu e blanco tabata comandante Mohammed Odeh, kende a bini despues di comandante martir Ezzedine al-Haddad”.

‘Marca pa morto’

“Nos a compromete nos mes pa elimina tur hende cu a lidera e masacre di 7 di october, y esey ta loke nos lo haci: nan tur ta marca pa morto, unda cu nan ta,” Katz a bisa den su publicacion riba X.

El a ripiti tambe meta di Israel pa pone fin na dominio di Hamas riba e teritorio Palestino y a haci mencion na un plan pa desplazamento forsa di su residentenan.

Desplazamento di habitantenan di Gaza ta un proyecto

apoya pa Minister di Finanzas di derecha extremo Bezael Smotrich. Presidente di Merca Donald Trump anteriormente a expresa apoyo pa e idea prome cu el a bandona esaki.

Na februari, Alto Comisionado di Nacionnan Uni pa Derechonan Humano, Volker Turk, a denuncia plannan “dirigi pa haci un cambio demografico permanente na Gaza”.

Seis morto den atakenan

Desde cu un acuerdo pa stop combate a drenta na vigor na Gaza na october 2025, 910 persona a ser mata pa Israel, segun ministerio di Salud di e teritorio.

Mahmud Bassal, vocero di agencia di defensa civil di Gaza, a conta AFP cu seis persona a muri den atakenan Israeli den bario luhoso Rimal di Ciudad di Gaza diamars anochi. Mientrastanto, un fuente di seguridad den e teritorio Palestino a reporta bombardeo den zuid.

Israel ainda ta mantene control riba 60 por ciento di Strip di Gaza, incluyendo tur punto di entrada y salida, mientras e poblacion ta concentra riba costa.

Despues di atake di Hamas di 7 di october 2023 contra Israel, Prome Minister Israeli Benjamin Netanyahu a priminti enfoca riba y elimina e lidernan tras di dje.

E atake a resulta den morto di 1.221 persona, segun un conteo di AFP basa riba cifra oficial Israeli.

E contesta di Israel na Gaza a mata por lo menos 72.803 persona, segun ministerio di Salud di e teritorio, cu ta opera bao autoridad di Hamas.

Israel anteriormente a mata ex-hefe politico di Hamas Ismail Haniyeh y Yahya Sinwar, kende tabata ampliamente considera como e cerebro tras di atake di 7 di october.

Tambe el a mata Mohammed Deif, comandante di hopi tempo di brasa arma di Hamas, conoci como Brigadanan Ezzedine Al-Qassam, manera tambe Mohammed Sinwar, kende a bin despues di su ruman Yahya Sinwar como hefe di Gaza.

Atakenan Israeli tambe a enfoca riba operacionnan di Hamas na Libano y comandantenan di Hezbollah respalda pa Iran y alia cu e grupo, incluyendo ex-hefe di Hezbollah Hassan Nasrallah.

Lider di oposicion destitui na Turkia ta bisa cu e no tin plan pa crea partido nobo

(Infobao) - Lider di oposicion destitui na Turkia, Ozgur Ozel, a descarta diaranson cualkier plan pa sali di CHP, cu ta den crisis, y forma un partido nobo, urgiendo miembronan di partido pa keda, segun medionan Turco a reporta.

CHP, e partido politico mas bieu di Turkia, a ser sacudi fuertemente pa un decision di corte riba 21 di mei cu a anula un eleccion primario di e partido na 2023 cu a eligi Ozel como lider, reinstalando su rival derota Kemal Kilicdaroglu.

Tres dia despues, polis contra estorbo a forsa nan entrada den sede di CHP na Ankara, tirando gas lagrimogeno y batiendo miembronan di partido, Ozel a conta AFP diadomingo anochi.

A pesar di e crisis, Ozel a move rapidamente pa des-



menti rumor cu e lo sali di e partido pa forma un fraccion politico nobo y a urgi su companeronan den e partido pa keda.

“Nos no tin intencion di

forma un partido nobo,” el a bisa periodistanan despues di atende oracionnan na Manisa cerca di e resort occidental di Izmir, riba prome dia di fiesta di Eid al-Fitr, diario BirGun a reporta.

Criticonan a denuncia e decision di corte como e ultimo intento sinberguensa pa elimina rivalnan politico principal di presidente Recep Tayyip Erdogan prome cu eleccionnan, cu mester ser

teni pa mei 2028.

Presion riba CHP a subi fuertemente desde su victoria amplio den eleccionnan local contra AKP di Erdogan na 2024, cu mas cu dies di su alcalde desde e momento ey a ser aresta bao acusacionnan cu ta varia for di corrupcion te conexionnan cu terrorismo.

Aresto y encarcelamento na maart 2025 di alcalde di Istanbul Ekrem Imamoglu — candidato presidencial di CHP y rival politico mas poderoso di Erdogan — a provoca e pio estorbonan di caya na Turkia den mas cu un decada, cu e partido liderando protestanan masivo cu a pone Ozel den centro di atencion.

Desde e momento ey e partido a subi den encuesta, mientras na mesun tempo e ta enfrente un serie confuso di demandanan legal cu ampliamente ta mira como politicamente motiva.